

T 3134/332.81

6

CHINESE - JAPANESE LIBRARY
HARVARD - YENCHING INSTITUTE
AT HARVARD UNIVERSITY
OCT 20 1941

通州志卷之十

人物志

后妃 鄉彥

戚里 殉難

鄉賢 祠祀 孝行

義行 僊釋

列女 藝術

流寓 郭邑附各條內

山川毓秀風氣鍾靈光我竹帛篤生偉人忠孝節烈炳如日星用昭激勸扶植人倫謨人物志

后妃

明陳皇后名壽穆宗繼妃神宗嫡母也父景行通州

候選歲貢生母張氏里中聞異香而后生因呼

其地曰香兒衞衞在州東門外生之日赤光四起隣

哈佛大學漢和圖書館珍藏印

人疑失火數歲父嘗襁負過城隍廟后輒驚語
父曰朱衣人起居道旁何也父疑城隍神教后
試云免禮后如言自是朱衣人不復見父欲爲
后製服飾告貸不應拾遺金於道足資其用蓋
屢著神異焉后性端凝每坐立不忤視不妄語
安重如山嘉靖三十七年穆宗在裕邸元妃薨
擇繼所司以景行女聞詔可先是后面有黑翳
聞命翳自除是年九月初九日發冊上命駙馬
謝詔告奉先殿英國公張溶禮部尙書吳山克

正副使奉冠服行納徵禮王皮弁親迎女官導
妃至王府贊拜合卺如禮次日王及妃乘輿至
東華門降入乾清宮上陞座行盥饋禮宮人以
棗栗盤授妃妃捧置於案執事舉案妃隨案至
上前復位贊王及妃皆四拜又次日妃至乾清
宮行視膳禮又次日王及妃詣奉先殿行廟見
禮十月詔授妃父景行爲錦衣衛副千戶四十
五年十二月世宗崩裕王卽位冊爲皇后隆慶
元年后以疾移居別宮御史王時舉

通州人王之

垣等疏請正位中宮以端國本上曰后侍朕久
無子且多病移居別宮暢意耳汝等不知內庭
事乃妄言耶御史復言皇后乃先帝選擇以配
陛下賢德著聞使之抑鬱成疾已不可乃云別
宮暢意豈有夫婦睽違而暢意者上曰待后疾
愈卽還宮勿多言隆慶六年穆宗崩神宗嗣位
尊爲仁聖皇太后時新遭大喪上方幼冲羣臣
疏請太后垂簾聽政卒使國無廢治海內晏如
太后之力也及崩羣臣恭上大行神主曰仁聖

孝安貞懿恭純溫惠佐天弘聖皇后景行晉後
軍都督府都督封固安伯子襲指揮使其兄景
榮之子承寵萬曆丁酉舉人

李太后穆宗之妃神宗生母也父偉母王氏其先
山西平陽府翼城縣人始祖政從成祖靖難軍
入燕占籍溇之永樂店嘉靖丙午十一月太后
生占星者奏后星見燕分直帝城東南旣長頴
敏特異授書過目成誦尤工書法父奇愛之庚
戌邊警移家京師居數歲以良家子入裕邸癸

亥神宗生丁卯穆宗改元進位貴妃壬申宴駕
神宗嗣位尊爲慈聖皇太后與仁聖陳太后並
稱兩宮萬曆六年戊寅上將舉大婚太后諭曰
官家婚禮將成我當還慈寧宮矣第動靜飲食
不得聞見訓誨爲憂慮耳一身爲天地神人之
主所繫匪輕務節飲食慎啓居依從老成人勸
諫不可溺愛衽席任用匪人以貽我憂卽此可
以祈天永命雖大孝不過是也后賢明熟典故
以父兄祿位侈盛懷盈滿之懼手書謙謹持盈

四大字賜之俾懸堂額以爲戒筆畫道隄上嘗
詔修慈寧宮閣臣張居正上言慈寧規制壯麗
足以娛聖母萬壽不宜時絀舉羸俾羣臣噴有
煩言上入告太后太后悅而罷之三十五年丁
未上命有司作景命殿萬壽閣於永樂里爲太
后祈福太后又出內帑新文廟及明倫堂庶爲
漸邑培育人才三十八年庚戌四月不雨上傳
太后諭發帑銀十萬差官賑濟漸邑四十二年
二月初九日崩享年六十有九上泣諭內閣曰

白聖母違和朕日齋虔祈禱侍藥視膳聖母諭
朕內外有罪當赦者赦之天下災傷處錢糧當
免者免之朕奉慈言正擬發旨不期遽爾崩逝
哀慟何追卿等可擬赦稿以昭聖母遺愛三月
初四日頒太后遺詔於天下臣民感泣閣臣葉
向高等上議諡曰孝定貞純欽心端肅弼天祚
聖皇后

姜賢妃父通州民世宗時選入宮時以大名府生
員陳萬言女爲首次妃次高氏女妃自以年穉

禮儀未諳讓居第三上嘉其不妬賜號賢妃數
賞賚其家云

戚里

李偉字士奇慈聖太后父也兒時黃冠過之奇其
形貌曰偉哉兒他日必大貴父聞而喜遂名曰
偉後慈聖太后入穆宗裕邸生神宗授錦衣衛
都指揮僉事神宗出閣加中軍都督府都督同
知及神宗踐祚晉爵武清伯誥贈三代皇子生
晉爵武清侯復誥贈三代官兩子皆都督時神

通州志
卷之十一
宗推恩外戚多異數偉小心承之國家有大典
禮如祀南北郊祀山陵幸學耕籍命偉居守郊
祀太祖配天命偉請神主偉益加勤慎上有賜
於家必下拜登受嘗戒子孫曰吾家榮寵過盛
心竊懼焉汝曹能鑒古成敗矜尙禮法以母負
上恩則吾知免矣以慈聖太后所書謙謹持盈
四字懸之堂時時稱述以爲家法諸子逡巡奉
教童僕斂戢無敢傲於市者與薦紳交務折節
下之無所請謁家受賜克積自奉甚約獨好施

與歲禮爲粥以食餓者疾則與藥喪則與槥拵
骼埋胔孳孳不已且曰是皆上恩吾以彰君賜
云耳萬曆癸未十二月卒年七十有四計聞上
輟朝賜諭祭治葬贈太傅安國公諡恭簡大學
士申時行誌其墓

李文全號中山偉長子慈聖太后兄也先授都督
父沒襲武清伯晉武清侯出入賜肩輿端方持
已正容示人性儉素積有助勞卒之日上輟朝
賜葬祭如禮

李文貴號敬山偉次子授都督真純和惠事父母以孝聞友愛兄弟謙謹守禮綽有賢名早卒

李文進偉第三子授御馬監太監持身清謹恪守

禮度早卒

李誠銘號仰鶴文全長子襲伯爵性英敏問學該洽刻意經史有儒者之風請上重修儒學

鄉賢祠祀祠在學宮名宦祠右

金賈少冲世宗朝仕至節度使

元王利用成宗朝封潞國公

李國輝至元間仕至左丞

明朱銳景泰間進士歷工部主事

孫節成化間舉人任稷山知縣

楊奉春成化間進士歷工部主事

顧大章弘治間舉人任西安府通判

周榮弘治間進士任蕭山知縣

甯河弘治間進士歷按察司僉事

蘇雄弘治間歲貢歷按察司僉事

李欽正德間進士歷工部侍郎

楊行中嘉靖間進士歷南京吏部尚書

王時舉嘉靖間進士歷大理寺少卿

張汝濟隆慶間舉人蒲臺陵川兩縣知縣

馬經綸萬曆間進士任河南道御史

蔡成已萬曆間進士歷刑部主事

楊鎬萬曆間舉人任泗水知縣

劉廷訓崇禎間歲貢吳橋縣訓導

皇清 張文煥康熙間誥贈吏部尚書

張士甄順治間進士歷官吏部尚書

楊正中

順治間進士歷官禮部左侍郎

李含春

順治間進士歷官鴻臚寺正卿

附澠邑鄉賢祠祀

遷主附祀通庠

遼郭世珍

景宗時仕至太尉司徒

金馬惠迪

天德間進士仕至留守

馬

諷

宣和間進士仕至刑部尚書

崔禮

金末四鄉教授

元郭汝梅

中統間仕至大興府尹

明董方

正統間進士歷刑部尚書

岳正

正統間進士入內閣參機務

張祥

萬曆間舉人壺關知縣

鄉彥

後漢楊球字方正漁陽泉州人

泉州即澠縣載沿革

舉孝廉補尚

書侍郎遷司隸校尉中常侍王甫等姦虐弄權

扇動中外球奏收甫等送獄盡誅之

三國田豫漁陽雍奴人

雍奴係武清縣

仕魏自弋陽太守遷南

陽盜賊屏迹郡內肅清後徵為衛尉屢辭位不

聽乃曰年七十而居位譬猶鍾鳴漏盡而夜行

不休也固以疾辭

北魏

高閭漁陽雍奴人博綜經史下筆成章自中書侍

郎為中書令給事中凡詔令碑銘贊頌之類皆

出其手文章富逸高允舉以自代時稱二高
遼郭世珍瀋陰人景宗時爲太尉司徒言聽諫從賜
地八千畝構亭曰獨秀爲歲時游息之所統和
六年承天太后侵宋俘獲甚衆師次范陽世珍
言降卒皆有父母妻子不無懷土之情驅而之
北終不爲用太后嘉納凡所縱數萬人

金馬諷字良弼瀋陰人金初以燕與宋諷游學汴梁
登宣和六年進士宗翰克汴京諷歸復登進士
調蔚州廣靈丞遷雄州歸信令境有河曰八尺

日每秋潦漲溢害民田諷視地高下疏決之患
遂息天德初爲寧州刺史民有告謀不軌者株
連數十百人諷察其無狀乃究問告者具伏其
誣衆感泣歷大理卿刑部尙書

馬惠廸字吉甫瀋陰人天德三年進士調昌邑令
察廉第一補尙書省令史大定中爲西京留守
判官以治最累遷左司郎中世宗愛其明敏朴
實以爲五品以下朝官罕有及者超授御史中
丞拜參知政事嘗諫世宗討烏底改曰得其人

通州志 卷之十
不可用有其地不可居恐不足勞聖慮後爲昭
義軍節度使歷南京留守

賈少冲字若虛通州人家貧力學日誦數百千言
嘗獲遺金歸其主弱冠從軍行伍間未嘗釋卷
中天眷二年進士調營州軍事判官遷安定令
時蔚州刺史恃貴不法屬吏畏之每事曲從少
冲守正不阿大定二年累遷刑部郎中決獄北
京奏誅首惡釋株連者全活凡千人嘗執奏刑
名甚堅旣退上謂侍臣曰少冲居下位有守如

此十四年以秘書少監使於宋却賂而還世宗
嘉之遷右諫議大夫歷順天軍節度使少冲外
柔內剛性簡易不喜言利嘗教諸子曰蔭所以
庇身管庫不可爲也聞者尙之

賈益字損之少冲子也少穎悟如成人大定十四
年父少冲使於宋益侍行時宋人嘗爭起立接
受國書之禮少冲問益曰萬一宋人欲變禮奈
何益曰守死無辱可謂使矣少冲大奇之中大
定十九年進士調河津主簿以父憂去官察廉

起復樊山令累遷安國軍節度使調民夫繕修
城郭爲戰守備按察司止之不聽曰治城守臣
事也按察無預旣而兵至以有備解去貞祐二
年召爲太常卿上防秋十三事論遷河北軍民
不便不報次年致仕

張亨字彥通灤陰人登皇統六年進士調樊山丞
以廉幹聞授弘州軍事判官累遷戶部尙書平
章政事張汝霖稱其吏才極高時車駕東巡欲
輦錢以支費用亨謂上京距都四千里若輓錢

而行是率三而致一也請行會便法息轉輸之
勞而用自足章宗初爲河東南北路提刑使兼
勸農採訪使察利病條十三事以聞上嘉納之
亨才識強敏每事存大體畧苛細故始終可稱
云

崔禮灤人仕金爲四鄉教諭金亡隱居灤東南小
安村構園亭植花卉自娛名聞朝野元丞相兀
都台及帖古迭兒時臨玩嘉其高節以金鐘駟
馬禮聘之終不出村舊有石刻今剝落不存

通州志 卷之十一
元張礎字可用其先渤海人祖知通州因家焉礎業
儒平章廉希憲薦於世祖時真定爲諸王阿里
不哥分地阿里不哥以礎不附已啣之遣使言
於世祖曰張礎我分地中人當以歸我世祖復
曰我方有事於宋如礎者實所倚任待天下平
定當遣還也凡徵發軍旅文檄悉出其手歷官
國子監祭酒出爲安豐總管卒諡文敏

王利用字國賓通州潞縣人幼穎悟與魏初同學
齊名事世祖於潛邸中統間拜監察御史薊州

有地禁民射獵邏者誣民冒禁籍其家利用糾
之邏者上訴利用辯益力民乃得復其所擢翰
林待制程試上都隆興等路儒士與耶律鑄同
修實錄歷四川提刑按察使除土豪之持官府
長短者元帥都塔海抑巫山縣民數百口爲奴
屢訴不決利用覆問盡出爲民大德二年改西
安興元兩路總管其在興元減職田租額站戶
之役於他郡者悉除之民甚便焉有婦毒殺其
夫問藥所從來吏教指爲富商所貨利用曰家

富而貨毒藥豈人情哉詢之果寃也成宗朝爲
太子賓客疏上時政十七事曰謹畏天戒取法
祖宗孝事母后敬奉至尊撫愛百姓敦本抑末
清心聽政寡慾養身酒宜節飲財宜節用有功
必賞有罪必罰杜絕讒言求納直諫官職量材
而授土役相時而動近侍時赴經筵講讀經史
上及太子嘉納之皇后聞之命錄別本以進每
自言平生讀書於恕字有得焉平章廉希憲慎
許可嘗語人曰當今文章政事兼備者王國賓
其人也武宗卽位封潞國公諡文貞

郭汝梅字和卿遼太尉世珍元孫也金太和丙寅
十二月生貞祐初瀋陰城陷老幼被戮汝梅時
年七歲其父琪母劉携禱火神廟願保護之無
斬郭嗣及灤河力不能負欲棄之遇赤犢橫來
扶置其背得免年十八攝行縣事耶律丞相知
其才奏克燕京都稅司以幹濟稱創驛舍百餘
楹不令擾及民間獄分男女凡供應行宮所須
及大小差徭先期告備又戢兇徒捕盜賊禁倡

優與齊民雜處修復薊門舊時刻漏禁市民惡
語相詈行之二歲風恬俗熙益戶萬二千餘事
聞擢總管中都路尹大興府數引見奏對稱旨
夙夜不懈叅佐化之亦皆勤恪中統五年卒初
潞陰地勢湫下數經水患汝梅出家貲立新莊
七所於高敞之地分處里人給貧者牛種令勿
償又創新河天津橋以濟行人其居鄉時事可
與宦蹟並傳云

李廷封潞陽郡公事蹟詳墓志載藝文志中

李秉彝字仲常通州潞縣人家世力田父瑀仕金
爲懷遠大將軍秉彝幼沉毅見人倨坐輒色變
七歲日誦書千言十歲能習古篆隸二十餘謁
行省粘合爲掾曹遷都事說粘合曰金亡人材
無所附麗天下初定宜拔其尤者爲朝廷用從
之於是聘王磐授弟子經日親士大夫遷員外
郎世祖伐宋從渡江收書萬卷以還中原兵火
後家少藏書至是遠近學者借讀無虛日文風
漸起遷中興等處行省郎中奉命賑恤玉門以

東全活無算至元甲子徙四川奏罷陝中司竹
之政歷漳德宣課運使課最擢尙書戶部侍郎
庚午秋奉命捕蝗明年京師饑請發廩賑貸又
明年魚兒泊饑再拯其民出爲都提舉漕運使
轉餉百萬石察廉能遷陝西按察副使巡行灌
州故有李公堰當三江口飄撼輒壞歲調發繕
修民甚苦秉彝督有司版築堅固三月堰成自
是潦則水行堰上旱則澹以溉田至今利之丁
丑除江州路總管屬邑有剽掠者有司以叛告

發兵擒之被俘者衆秉彝邀諸津訊釋無辜千
餘人黃州叛九江戍卒單弱甚呂師龍新降爲
招討使擁精騎千百檄使捍禦不聽秉彝夜登
庾樓遙望小舟順流下遂獲七人自黃州持書
期師龍爲內應秉彝立赴師龍所諭以利害師
龍誓不知情秉彝曰審爾何不分兵守城師龍
如言九江遂安其兄師夔自江西奉黃金奴婢
爲謝却不受義門陳氏苦縣吏貪虐戕之或以
叛告秉彝曰非也密遣其姻黨招撫之保其族

千人遷湖州總管徙常德沘江泛溢立堤防以制湍浪官種柑橘五百株以代民貢歲歉民饑不俟命開倉賑之武陵人立碑誦遺愛累遷工部尙書丁亥四月卒年六十五秉彝徙居彰德遂葬臨漳當仕安陽時聘緱山杜英率僚吏講學於思義堂蒞九江禮其鄉先生袁枋牟鎔故崇政說書陳有宗湖州則故端明殿學上陳存故叅知政事文及翁皆請以師道主學校使時人矜式秉彝辨問不倦有所自得嘗名齋曰閑

邪或求爲吏以東坡穎濱手書奏議三十冊獻秉彝曰賂可受乎平生斥玩好戒子孫曰凡物之罕有者我獨有之必有奇禍云贊曰中統至元之初人材衆矣當其時戰勝攻取海內向平蓋必有知立國之意者相與彌綸於其間如秉彝可一二數也詩曰質爾人民謹爾侯度今之

古人哉

是傳舊志及元史俱不載州孝廉任希尹得之快雪堂帙云聊城周馳誤吳興

趙孟頫書錄以見遺遂點竄數行詳載志中

李德輝字仲實通州潞縣人生五歲父且卒指德

通州志 卷之十一
輝謂家人曰吾爲吏治獄不任苛刻平反者衆
天或報之是兒其大吾門乎及卒德輝號慟如
成人既就外傳嗜讀書家貧無以自資乃輟業
年十六監酒豐州市筆札錄書夜誦不休世祖
在潛藩使侍裕宗講讀遷從宜府使理財賦調
軍食以給取蜀之兵中統元年爲燕京宣撫使
捕誅劇盜令行禁止爲山西宣慰使勢家多籍
民爲奴按免之復業近千人至元二年爲太原
路總管崇學校表孝節勸耕桑立杜倉一權度

境生嘉禾瑞麥五年爲右三部尙書奉命錄囚
山西河東懷仁民魏氏發得木偶告其妻挾左
道爲厭勝謀不利於己獄詞具德輝察之知其
有嬖妾疑妾所爲以陷其妻召妾一訊卽服遂
杖其夫而論其妾死安西王鎮關中改安西王
相視瀕涇營牧故地得數千頃起廬舍疏溝澮
假牛種田具令貧民二千家屯田其中歲得粟
麥芻藁萬計十二年詔以王相撫蜀遷四川行
樞密院副使既拔重慶圍合州縱歸合俘之繫

順慶獄者使諭降州將張珏王立立請降德輝
單舸濟江薄城下呼立出降安集其民改置官
吏家繪像事之十七年爲西安行省左丞西南
夷羅施鬼國旣降復叛詔雲南川湖合兵討之
兵且歷境德輝在播州馳驛止三道兵勿進遣
使諭鬼國趣降其酋阿察熟德輝名曰是活合
州李公耶卽身至播州泣告曰吾屬百萬微公
來死且不降今得所歸矣後有譖德輝受鬼國
馬千數者帝曰是人朕所素知雖一羊不妄受

寧有是耶及卒蠻夷哭之如私親爲位而祭者
千百人合州安撫使王立衰經率吏民拜奠哭
聲震山谷民立廟祀之賜諡忠宣

明朱銳通州人天順辛未進士初入州庠宿學舍同
舍生有亡銀簪者意銳匿之銳弗辨計直以償
後同舍生於他處得簪乃大愧還其直嘗於學
官前拾遺金銀器一囊挈俟門外頃之果有泣
涕來覓者詢得實盡歸之其人願中分以謝不
受歷工部郎中每奉差過鄉里至西郭外卽下

馬步行遇親識無貴賤一以禮接之鄉人至今

稱為長者

償金還金二事殆合直不疑裴晉公為一人也稱為長者不虛矣

董子和字有節灤縣人通經史大義居家孝友內

外稱之侍父疾旦夕不懈父沒慟絕復蘇生平

樂善好施給棺槨助婚嫁焚貸券里有牧官馬

而斃者官府追呼急無以應將自縊子和貸以

償之得不死時蝗旱民不聊生各賑以粟全活

甚眾尤厚恤宗族以子昱貴贈奉政大夫

董方字仲矩其先太原忻州人永樂中父母隨叔

應募徙灤方少入縣庠登正統乙丑進士歷夫

理寺正法律精明濟以仁恕東阿民蔣杰與盜

遇并逮之訥弗能辯榜掠誣服方訊實釋之錦

衣旗軍鉄堅與百戶薛滿鬪傷腦奪理髮簪僉

擬白晝奪財傷人者死方謂事起忿爭非造意

刦奪從輕典金吾衛卒領大內官銅出道中竊

銅板尺餘邏卒執之有司擬盜內庫物律斬方

謂物既領出非潛入內庫者比宜論監臨自盜

得減死奉命往山西錄囚太原民白政讐殺王

選投尸汾河事覺政誣選妻與已私同謀殺夫
獄成方駁之以謂彼夫婦三十餘年舉子十數
人何至是盡拘隣里証驗政具服羅禮妻爲盜
所殺有司坐罪劉達夫婦論死方白其寃後知
殺人者達婿也其餘活死罪可矜疑者凡若干
人還朝建言十事成化間由刑部侍郎遷都察
院右都御史巡撫大同大同久不雨方至祈雨
輒應河南軍戍大同者多僦民居方構營房若
干衆論稱便戰馬斃者以千數爲區畫買補遺

月遂是遷刑部尙書又建白十五事致仕卒年
六十八謚襄毅方好學政暇手不釋卷凡滯獄
沉寃多所昭雪時以包待制呼之性儉素獨不
吝賑恤族弟翰瞽戚屬張貴劉清無子俱爲之
納妾使不乏嗣二女弟之甥孟謙馬總幼喪母
從子寬三歲而孤皆教養成立其篤於親故多
此類子寧壬辰進士

岳正字季方別號蒙泉灤縣人舉於鄉入國子監
祭酒李時勉器重之正統戊辰會試第一進士

及第授翰林院編修嘗閉戶夜草疏請復恭讓
后位號兄端俯樓隙窺之驚曰奈老母何裂其
稿而止天順間遷修撰召見文華殿上遙見稱
善及問年及鄉里治何經何科進士正以次對
皆益稱善遂入內閣正感上知遇銳意功業知
無不言寢欽天監湯序變異之說以安衆心當
奸僧妖言律活其從數十人有投匿名書指斥
時政者石亨勸上出榜格募捕告正曰爲政有
體盜賊責兵部奸宄責法司豈有天子自出榜

購募之理且欲窮其事緩則自露急則愈匿不
如勿究上是之亨從子彪鎮大同遣使獻捷內
閣詢狀其人盛陳戰伐且稱斬首無算皆梟於
林木之上正取地圖指示曰某地至某地四面
皆沙漠梟於何所其人驚伏間爲上言石亨與
太監曹吉祥恃寵擅權宜早節制上曰汝可以
朕意告之正徑造亨諷令斂戢二人怨之益深
會承天門災上下詔責躬正視草歷陳弊政詞
極切直遂有飛語指爲謗訕降廣東欽州同知

通州志 卷之十一
道漕以母老留闕月曹石黨喉邏者以私事出
之逮繫詔獄考掠備至謫戍肅州鎮彝所至
州夜宿傳舍手梏急氣奔且死涿人楊四尙意
氣舉酒醉解役伺熟睡謂正曰梏有封印奈何
正教以酒噴封紙就炙之得燥昂起乃去封脫
梏剗其中復釘而封之楊四又重賂解役得至
戍所上每憶及輒曰岳正倒好只是大膽曹石
敗釋爲民憲宗卽位以原職克經筵講官纂修
先朝實錄尋被譖出知福建興化府建涵江書

院及孔子廟鑄祭器開小西湖兼濟河築南北
堤塞北埕港別購民田開河直趨涵口修江口
橋及通津鉄河猴溪諸橋購穀實饑民倉又教
民輸料京庫親爲會計絕侵漁省其費大半而
素覓利於官者一旦弗得騰謗莫遏惟彭韶陳
音爲辯之巳丑入覲致仕喪幼子慟而成疾壬
辰九月十一日卒年五十五正偉貌美髯性剛
而志高遇事敢言不避權貴有古豪傑風問學
該博爲文務究精義詩亦雅健工書法雕繪皆

妙嘗戲畫葡萄遂稱絕品所著有類博稿十卷
行於世深衣纂誤一卷藏於家嘉靖二年追贈
太常卿諡文肅建祠祀之其婿李東陽贊曰才
之難其信然哉非才之難用之者難也公以文
學取甲科天順復辟遭際極盛遂乃感慨奮發
忘身殉國方將以忠烈顯而為權奸所厄處僻
投荒不究其志以死豈才弗能哉然文章氣節
震播海內傳之後世有斷斷乎不可泯者興化
人既去而思立祠以祀他可知已備述之以補

國史之闕且手書一通昇其從子坪從孫鴻臚

序班梁俾遺其後之人

石淙楊一清東西涯李東陽曰蒙泉先生以文

章氣節高一世嘗擬之漢汲黯朱李綱成敗利
鈍不論也葉文莊公為墓誌選述似未盡蓋金
緝在躬非所以幸先生又借李白柳宗元為論
雖有所指豈其倫哉承示補傳平生所知聞包
括殆盡其名之長庶幾在此夫以門墻肺腑之
深厚見而知之其言足傳而信宜莫若我西涯
公者而是傳乃成於三十年後抑又何故耶。
溫陵李贊曰岳公請上節制曹石上令告以朕
意公亦不避禍患徑造亨諷諭嗚呼此何事也
可使岳正述意哉若成祖之體恤楊崇仁宗之
體恤楊士奇則可謂委曲周至矣又曰楊石淙
以葉文莊端志為未詳以太白柳州比擬為非
類以金緝在躬非所以幸先生字字皆滴血可
畏也又責李西涯補傳成於三十年後其言尤

真切世間一日如過隙誰能待爾一落遂三十年也

孫節字守中沁州人生平負氣岍不苟交遊惟與庠生楊勝無莫逆交成化乙酉舉人知山西稷山縣有清操以任氣不容於時罷官歸單瓢屢空晏如也日與舊友楊勝論道談詩獎進後學時仰重之子泉亦舉鄉試任河南析川訓導迎養之時楊勝沒二年瀕行爲文辭墓悲痛若骨肉然其篤於友誼如此

楊奉春字世宗原籍錦衣衛成化乙未進士授工部主事篤於孝友博學能文居官以清慎聞

顧大章字天和號小容通州人弘治乙卯舉人性聰敏倜儻不羣問學博瞻治舉子業不徇時俗善詩歌古文凡著作援筆立就都不點竄任西安通判有小容集行於世

周榮字國信原籍神武中衛弘治己未進士知徐州蕭山縣嘗有欲強奸民婦者婦不從僧殺之時其夫他山婦家誣服其弟當殺人者律一日榮夢婦白寃狀甚悉遂託疾延醫從俗飯僧而

通州志 卷之十一
殺人之僧亦至禽治之一訊而決遂釋其弟邑人服其神明

寧河字伯東號石津進士賢之子也弘治乙丑進士授戶部主事左遷河南臨漳知縣政績具載彰德郡志中遷德州知州隨都御史馬中錫招撫流賊劉六等將就平爲璫沮當路夙知其才擢河南按察使僉事備兵信陽時信陽爲盜賊負固地河至發奸摘伏雖閭里銖兩之細皆無遁情一時巨猾捕治畧盡信陽人謂前後監司

莫與匹也立祠祀之

蘇雄通州人弘治間歲貢授大理寺評事歷山西按察司僉事居家孝友睦鄉里服官勤慎性不與世浮沉復能隨機應變鄉人稱之曰冰霜節操生死不二其心順逆不喪其守舉祀鄉賢

李欽字敬之號心齋世襲武清衛百戶初因祖贊張氏從其姓後復姓李髫髻卽能大書讀書務深造爲文沉摯雅健大父奇之曰他日必宗正德癸未進士由行人擢監察御史巡視居

庸關丁丑七月武宗欲出關北狩已駐昌平欽
令外分守指揮孫璽閉門勿啓內分守太監李
嵩將往昌平迎駕欽止之曰車駕此行關係甚
大爾不見先朝土木事乎萬一變生不測爾我
雖死不足償萬一也未幾千戶閻岳奉命宣內
外分守官先至南口孫璽曰御史在不受命乃
宣內守臣欽恐嵩導上過關乃收門鑰之在嵩
處者又慮旗校奪門出因負勅印閉居庸南門
手刃坐其下云有人來奪門者御史卽自殺然

燭索紙連具三疏馳奏闕岳到昌平述御史阻
駕狀上怒將逮欽而疏適至上覽之感悟由東
馬房通州張家灣以歸直聲大震皆謂張御史
閉關抗上雖漢邳惲不若也再按陝西劾罷鎮
守潼關太監嘉靖初出知陝西漢中府總制楊
一清疏薦擢延綏兵備副史欽請給關防置簿
籍釐剔衛所積弊鳳翔有地曰胡店山險多巨
盜欽畫禽勦之策巡撫劉允從之賊平固原迤
北地平衍敵易闖入欽受總制檄東自環縣西

抵蘭州幾千里內多立塹壘不三月告成邊地
賴之累遷右副都御史巡撫四川四川每歲徵
收糧額一人多至千石難辦易侵欽令郡縣多
簽收戶每戶無過百石數少易完上下稱便請
城堡增戍於獐獵以禦西北築隄防以捍嘉定
水患嘉定人立石頌之欽性剛正與人不作媿
媿態在邊郡積歲不遷或勸少為俯仰欽正色
曰是有命焉可澳忍求之耶事親篤孝年已四
十父母每不懌輒跽侍必俟色笑乃起嘗語人

曰事君事親俱不可有欺心一或有欺何所不
忍為凡待屬吏及百姓皆以至誠為本嘉靖壬

寅卒年六十有六歷仕三十年家無儲積卒後

其子至不能餬口人益多其廉潔云

冢宰王瓊為閉關圖

以記之云當武宗之出也上疏非難閉關為難
閉關非難回鑾為難夫御史巡關而能扃戶以
拒人主之出人主臨關而憚直臣以回既出之
鑾非君臣間盛美事哉心齋志存忠義不以利
害動不為死生怵故其後攻擊權奸困躓
邊郡俱不辭也古有骨鯁臣心齋之謂矣

楊行中字惟慎號潞橋通州人姿容修偉父疇取
與不苟嘗拾遺金歸其主友愛兄弟第亡撫其

通州志 卷之十一
子女如所生人稱其有隱德焉行中登正德庚辰進士嘉靖癸未廷試知山陰縣厚重廉平雖芻劇中不越常度興學勸農招集流亡又築隄捍海士民大悅擢監察御史巡按遼東巡撫呂經激遼陽廣寧兵變差緹騎逮經軍士疑其偽譁未已兵部議勦行中請榜示諸城令亂者自相擒捕以贖罪從之兵遂寢世宗將幸承天行中力諫上震怒命廷杖會風變得免歷南京都察院右僉都御史提督操江查補缺額官軍七

十餘名有議處將領及議處民兵之疏楊子江巨盜黃勤等聚黨結鹽徒地方洶洶行中密授將士方畧捕獲之餘黨一時解散人呼爲江神累遷刑部侍郎奉命案鄭王但列王驕僻狀而洗其不軌之冤釋株連者數百人遷南京工部尙書疏請博咨才畧以備安攘因舉侍郎鮑象賢總兵俞大猷等從之時倭寇猖獗南京城久圯請修葺以便防守遷南京吏部尙書行中素遠嚴嵩至是爲嵩黨劾罷隆慶六年卒年八十

有四其始爲御史也章凡十餘上皆允行左都
御史王廷相稱其剛直明練途遇武定侯郭勛
家人有怙勢狀拘而杖之勛詣門謝罪爲御史
十年不調吏部尙書許讚擬擢之語同列云吾
今薦一不識面御史何如初救陶仲文於戍所
仲文貴幸欲有以報行中却遠之曰彼非吾徒
吾亦非彼德也行中年六十餘父卒猶孺子泣
慟號幾毀俸悉贍族無所私恡居鄉恂恂如寒
素通州昔未有志行中爲纂輯今所傳志畧是

也

聶宗元字陽春號近川祖以軍功爲京衛指揮始
居灤縣嘉靖癸卯舉人從遊日衆如副使殷仁
通政王汝言叅議劉時敏皆門下知名士也知
山西忻州議科條均賦稅不嚴而治時值大荒
悉心經理全活千餘人且擒治舉火剽掠爲民
害者北敵突入忻代間勢甚訐設禦出奇斬十
三級擒三酋地方遂寧巡撫將薦之被譖歸子
大經京營副將迎養於京蓋年八十有八矣性

通州志 卷之十一 孝友和厚篤交誼鄆人至今稱之

王時舉字晉卿號養吾其先江西人洪武初始祖英克錦衣衛徙通州時舉生四日而母亡育於祖母桂登嘉靖壬戌進士授河南府推官初偃師縣有田氏黃氏相友善指腹約婚及黃生女曰秋雲田生男曰克普兩家交賀約如初後黃登第位通顯田儒素如故貧不能聘黃慚欲寒舊盟女知之急請於母密遣隣姬約克普暮至某所遺以金使備禮娶歸克普聞之狂喜其友

朱龍沈橋見其貌訝訊之以實告龍橋思攘其貨醉克普以酒暮造約所果有黃金在地持以行時秋雲同侍婢睨於旁婢訝非田生且熟二人面呼其名叱之二人懼事露不免剗刃掠金去克普醒始憶前約而在見兩屍血淋漓仆地駭極反走遺一履不及躡血漬襟袖事發不能自白坐抵罪時舉至心疑其寃往按之未決夜夢一女子訴曰某某實殺妾者逮田生枉矣覺而異之乃審夢中狀捕二人至訊之叩首請伏

通州志 卷之一
發其金猶在也抵以法田生得釋偃師稱爲神
明擢監察御史以言事忤權貴謫徙延慶隆慶
改元召補山西道御史巡按貴州時戎備久弛
土獠剽掠載道時舉檄各道督游校偵察之懸
賞厲戒期撲亂首分別土司地界界內有亂酋
長連坐羣盜一時屏息時中宮以無子寵衰時
舉於萬里外疏請正位中宮以端治本語極切
直臺諫有被謫者申救甚力至於議屯田議鹽
政議貴陽更置城邑無不切中時察其請表章

曾大母貞節一疏一字一淚遠過陳情表也萬
曆初掌河南道疏請復建文年號大義侃侃歷
大理少卿悉心決疑獄求生法不得則歎息而
後置之理年四十有六卒於官卒逾月妻董舉
一子曰實堅側室王亦有遺腹舉一子曰實穎
人以爲天錫之蔭云

張汝濟字仁甫號育泉先世由浙江鄞縣以軍籍
隸通州衛性豁達不屑家人生產日與兄孝廉
汝源自相師友隆慶丁卯舉人知蒲臺縣亢旱

禱雨輒應夜巡舊派編戶改役民壯糧賦舊爲
里甲包收多侵漁乃立八櫃擇淳謹之民分守
之令自封投納又釐鹽弊絕餽遺薄於自奉大
吏有媿阿耻同俗吏方正卓有古風之薦再知
陵川縣悉心讞獄置首惡於理釋無辜數人興
學育才戢奸馴暴一如治蒲之政去之日士民
攀留追送如失慈母焉旣歸州守敦致賓筵不
以私謁有司然民生利病所在輒昌言不諱如
張家灣舊有稅名地基錢皆奸民私斂肥已力

請裁革通州向辦工部車馬每一僉派比屋驚
擾力請州守更之性好贍族濟緩急助婚喪訓
諸子以忠孝次子櫟芳成進士典選廉慎遵父
教也卒祀鄉賢崇禎辛巳蒲臺人思之上治行
崇祀名宦蓋去爲令時四十年矣

岑應春字繹仁號雲石本徽州汪氏曾祖璉爲常
州推官寓武進嘉靖中父宗沆偕母丁北上生
於京師三歲父沒無以自存母改適慈谿岑氏
岑故州吏占籍通州遂從岑姓爲通州人好學

耽思以文行著楊吏部行中以國器許之萬曆
丙戌進士授工部屯田司主事營山陵與內監
同事相忤出董清河陶務清河人歲辦陶千里
輸納所司核當否然後返陶所受直然曰辦曰
輸曰核無一不爲陶人難者以故清河人輒以
陶死比受直又多侵蝕應春憫之立法甫陶卽
予直附糧艘赴納囑所司曰未輸之先已核於
陶所勿再擾也疏請勒石以紓陶人之困已而
備兵東兗兗荒多盜人相食設法賑之盜賊不

敢窺境上遷岢嵐副使岢嵐故邊郡武備日弛
爲設新障百八十里邊人稱爲岑公堡焉又却
羨緝絕供應政聲卓然亡何有追論清河陶不
如法者中旨鐫秩則向所忤內監中之也昔應
春父卒寄殯敗寺鄉薦後始葬永定之阡適浙
爲繼父營葬其先又爲繼父置媵生二子封如
其官蓋以報撫育恩也萬曆戊戌卒年五十有
五葬州城南藁村後十餘年清河人段世貞率
其屬于役過之感治陶之德痛哭拜奠而去子

光緒字績之生未數月父及嫡母陳氏生母王氏同時歿庶母徐氏謝氏教養成立

二氏見崇列女傳

禎癸酉舉人累官陝西平陽道兵備副使遷苑

馬寺卿事兩庶母如其母兩母子之不啻所生

壯而有室稍違即與杖受之無忤色初應春以

未得復姓為恨疾篤時猶書空作草疏狀請歸

宗光緒既貴復姓汪仍家武進以成父志

楊景芳先世以扈從自淮安徙通居城南藁村力

農家頗饒常見一貧士覓食村中詢知避難留

歸三載而去後士登第來謝及為府尹數餽遺

相延景芳卒不詣其署高潔如此子錫字南軒

有隱德善教子

楊惟清惟洪惟治皆景芳之孫錫之子也惟清字

子廉號明野博極羣書萬曆癸酉舉人知山西

太谷縣愛民多善政居鄉無疾言遽色犯而不

校里中有無辜罹法者力雪其冤嘗貸金於人

弗償取券焚之有子八人皆醇謹力學以次子

若桐令睢寧贈如其官孫士炘士斌俱進士惟

洪字子寬號襟野初習章句父使佐家政輟業
及見伯兄舉於鄉慨然曰我亦能致科名胡爲
自棄也閉戶日夜誦習壬午亦登賢書早卒以
子若梓貴贈禮部員外惟治字子理號同野性
篤孝父母卒哀毀幾殆廬墓每風生木落長號
不已萬曆壬辰進士知南陽縣地當孔道供億
若流惟治經紀有緒不困郵傳歲荒多殍又大
疫亟請發廩以賑購藥選醫多方濟之前後活
者幾萬人盜賊竊發設法掩捕悉駭散中使奉

命開礦惟治力爭南陽無礦寧歲輸二百金以
安山谷及民間廬墓大災後民益困多逋賦乃
不加鞭督婉諭急公令自封投納革耗羨民樂
輸恐後聽頌片言立剖矜宥小過然豪強故犯
務置之法遠近悅服三年邑大治舉卓異第一
擢刑部主事累遷郎中居刑署九年持法明允
嘗盛暑閱獄見圜扉早閉多蒸鬱癘氣憐之許
每晨啓戶納涼請著爲令遷河南布政司叅政
礦盜嘯聚民倉皇出走馳檄撫之移時解散他

若開煤窰濟公需修藩封四年積有勞勩擢陝西按察使飭憲秉操丰裁峻整墨吏聞風解綬去既歸好作樂府詞千言立奏不在宋元下也每歲按部使者造門請謁數謝弗見見亦不及私疏入必以耆碩推之畿內有警多他徙獨與州守登陴畫地固守捐五百金爲修城助樓櫓屹然爲畿輔保障崇禎辛未卒年七十有四第三子若橋亦進士由行人遷河南道監察御史所著有香雪齋集通署詠行世孫正中別有傳

楊若梓字原育號芑寰惟洪仲子也有至性數歲父卒事母張以孝聞萬曆癸丑進士授河南信陽知州約已愛民禁羨耗息爭訟虛公訊獄務得其情案牘不假吏手娓娓千言堂上立就著有申陽未議初泄政據案審決監司洪某意輕之易服入矚於旁聞者密以告斷聽自若不少動洪由是奇其才凡疑獄悉委鞠焉歲旱步禱跪暴烈日中雨立至謂未霑足跪如故洪某冒雨至掖之起又勸農桑宣六諭課士文藝多所

造就察廉奏最擢禮部祠祭司員外郎攝儀制
司篆無何神宗光宗相繼崩大禮疊至若梓擘
畫精詳而建議改元尤有卓識當光宗初立也
議以明年爲泰昌及光宗又崩閣臣九卿皆難
之若梓進曰是未可以成例拘也一年三君前
代所無若以明年爲泰昌則無以處今上然遂
以明年爲天啓則無以存先帝皆不可請自今
卽改爲泰昌元年明年春正別爲今上紀元既
存先帝之元又尊今上之統庶於情理爲愜於

是閣臣九卿皆是其議草奏以聞先是光宗卽
位京營及邊軍皆有賞獨不及通州五衛若梓
力請得邀賞如例云

張祥字夢麟號魯郊溧縣人孝友廉慈遇事敢爲
凡事有不便民者輒條議以蘇民困萬曆丙子
舉人知壺關縣調原武皆有異政及歸兩臺連
章請留民百餘亦詣闕請留不報建祠祀之復
刻石誌去思焉居鄉潛心理學身體力行未嘗
嘗以一事干人然葺學宮立文會新岳文肅公

通州志
祠倡率恐後卒之日督學左光斗奏請祀鄉賢
馬經綸字主一號誠所其先霍山人以靖難功世
襲通州衛千戶爲通州人萬曆己丑進士知肥
城縣挾仁贈編以往仁贈編者素所集先達格
言以爲治譜者也至任以召募代徭役以浮羨
克丁糧闢至道書院以課士易土城以石繕修
堅固旣竣曰民罷矣引丘邑徼例請寬歲額
若干考最擢監察御史投牒上官曰治縣日淺
不足見長願任此三十年或可成循良之績入

京將疏請還治肥或阻以非制不果上時尙書
孫丕揚奏丁此呂貪縱戎政侍郎沈思考上疏
爲此呂營救經綸以思考爲首禍之臣請斥罷
之大意謂息辯胎以息禍胎息正人君子之禍
以息宗廟社稷之禍且曰思考將以朋黨之說
激怒皇上自古小人欲禍朝紳而毒國家未有
不以此中人主者語多切直時論避之又因海
防兵課疏陳處置五策并條上邊薊五事方是
時上方銳譴言官旬日中被斥至三十有四人

中外震恐噤不敢出聲經綸獨具疏力爭至以
五事責上上覽疏大怒

疏在藝文中

降米脂典史尋

削籍富平孫吏部立亭曰真鐵石漢也後聞溫
陵李贄見逐麻城迎居通州贄被逮與俱贄死
收葬詳卓吾傳中又還侍郎李欽墓葬業師李
春雱及友李吉所武舍春於鄉會坊置義地以
歲給貧士其好義如此僻居村野終日誦讀寡
言笑動作乙巳疾篤友人張祥來視曰到此全
要主持答曰學道有年到此時纔是學道正容

端坐而卒年四十有四州人罷市巷哭肥城人
聞之不遠千里匍匐來弔門人私謚曰聞道先
生子貢生健順字貞元少孤能讀書繼先業時
州人楊世揚善史學多識古人姓氏地里物產
器服字畫詩曲稗乘諸瑣細事韓登瀛好釋經
及諸禪語錄健順獨尙程朱之語經傳格言往
往成誦然頗多放言每三人對談縱橫辯博皆
出人意意外或問讀古書苦不解又不能憶健順
曰淵明不求甚解東坡不求甚熟得此二法日

能解能憶矣將卒自爲懺悔文示諸子曰君子
不憂不懼吾不能也吾所謂知憂懼者也卒年
四十九子五人家學家脉州庠生家式武進士
家穀武學生家師武進士仕廣東虎頭門遊擊
羅永春號和陽通州張家灣人性穎敏一目數行
年十四千言立就萬曆丙午舉人任長垣教諭
倡明性學以身率人一時彬彬蔚起歷遷紹興
府同知潔已愛民屏絕私餽時郡守及諸邑令
朝覲京師永春攝一府六縣篆案牘如山積耳
聽口答筆不停判年八十餘好學如少年和易
近人鄉里稱其雅量

雷應科號觀齋明初以軍功世襲指揮由臨川徙
通州資行醇茂篤學不倦萬曆中以歲貢歷代
州五臺令爲政寬和而抵逆子以極刑民間稱
快子起龍字伯起號震潛萬曆丙辰進士知三
原縣三原與涇縣隣兩邑民共引水溉田其曰
分水曰爭水曰侵水曰盜水曰霸水訟端種種
一切以法繩之戢強暴安寡弱令毋失生業調

通州志
卷之十
四
霑化及長清爲政如治三原時累遷刑部郎中
奉命恤刑兩浙平反冤獄以百計性明決負氣
節不畏權勢好面折人過失以洩其不平或事
當盤錯人所逡巡不敢試者輒一往直前無復
瞻顧得失或相半亦不悔胸懷洞豁人皆見之
嘗里居以郎官謁漕使闌止下輿閣中扉導側
門入忿然作色徑回車不顧在浙不拜魏璫生
祠少好學嗜古居盤山讀書十數年手錄諸子
百家甚多

蔡成已字復仁號任宇萬曆己丑進士知錢塘縣
調三原及汾陽補蘄水四歷劇邑多惠政其置
義田於汾設社學於蘄尤卓卓焉遷刑部主事
以饘粥食囚命獄卒滌械器州人士跡其服官
廉惠家居恬靜請於督學左光斗入祀鄉賢
楊鎬字京卿號後橋吏部行中子也萬曆己酉舉
人知汜水縣堂上揭天理二字不避權貴恤郵
傳清賦役夙弊悉除家居自奉過薄或謂之曰
若此何用官爲正色答曰予豈溫飽者流恐愧

先人清白耳戶部尚書李三才寓通相與講求
慎獨誠意之旨力行不懈臨卒謂諸子曰此時
心上一物不着可以見先公不愧矣李三才銘
其墓子六人其仲世揚字二遠好探奇索隱有
博洽名

李可久字如我通州人博學善教出其門者多知
名士萬曆壬子與其弟鉉之同舉於鄉授完縣
教諭勤於課士文風蔚起遷河南息縣知縣河
工方興民困畚鍤逃亡無算可久請出公帑僱

役始得安堵邑試童子有鄉紳居要地者請以
其子爲第一可久以文爲衡乙置之紳愠嗾當
事劾之左遷衡府典膳比歸偕鄉人結七篇文
社以課後進其樂育人才始終不倦如此里人
稱師法者必曰李先生云

張文燧字彥彪號湛生汝濟家孫杞芳子也崇禎
甲戌與弟徽寧兵備文輝同登進士知益都縣
俗桀黠難治至則抑豪強保良善禁衡邸諸閹
之以稱貸尅民錢者課諸生文藝講明性命之

理手錄薛文清格言授之三年奏最將遷士民
請留復任八年擢吏部驗封主事歷文選員外
甲申之變奉兩親適弟徽寧署迨弟死事於閩
奉母棲會稽之若耶溪上從子士甄貴貽書請
還卒不出性狷介寡言笑讀書沈細工書法晚
益工詩有彥彪近藝怡怡堂詩集行世當流賊
破都城索士大夫甚急文烜子士壽欲脫其父
出見賊被殺事具孝行傳中

李國泰字仲開號傲陞張家灣人也幼敏穎嗜學
馬經綸亟稱其文令其子徼順結爲友萬曆乙
卯舉人署南樂縣教諭教諸生爲文有法度遷
山東金鄉縣知縣迎養父及庶母諸弟恩禮備
至子懋華聘雷起鯨女馬侍御經綸外孫也崇
禎己巳起鯨避兵率家屬南下輿疾投之國泰
使迎道中至縣而起鯨卒時歲暮爲辦喪事甚
悉迎雷氏家屬入署中明年春爲起鯨發喪躬
送北門外十數里哭之使使引柩抵家遷大理
寺評事父卒持喪歸葬爲諸弟營居宅使與已

等國泰居官廉謹又分散諸弟貧困益甚遷寺
正卒庶母及諸弟以次皆卒明末疫大作妻曾
氏及子懋華生華同時卒遺一孫昂懋華出
蔡循節字培吾崇禎間諸生不好治生亦不甚習
帖括嘗曰吾願黃冠爲五岳遊自號五岳山人
孤情介性亭亭物外少時負意氣嘗於長至日
官府畢集以大義責某遊擊聲色俱厲爲其辱
某諸生也遊擊惶懼請罪乃已

高雲漢字翔舉生平不殺生不服絲絹館馬侍御
經綸所教弟子亦不得服絲絹立教嚴肅弟子
進見如神明其語默動作皆有法度

陳所志號尙莽州庠生馬侍御經綸高第弟子也
性篤厚訥言家世業醫視人疾病以爲生死所
繫雖微不敢忽以故手到輒愈或瀕危獲濟焉
雅好自修薄於責人崇禎辛巳諸生以行優舉
於督學吳履中准給冠帶旌其門曰碩德可風
州守舉爲鄉飲賓年至八十餘

朱光煥字雲輝號天章世襲神武衛指揮桂芳子

也善御士卒有守城功明末土賊乘亂劫掠州人震恐光煥督兵登陴晝夜捍禦衣甲而卧者數十日戒軍士不許入民舍犯者貫耳號令嚴明士民安堵釋老弱之爲流賊脅降者全活甚衆本朝錄其家丁爲總兵遊擊者十餘人皆煥訓練所貽也子四人國垣鎮江都司清垣遷安把總盛垣州同昌垣監生孫十五人承錫榮錫州庠生

皇清

劉爾發字性之號如未父廷諫僉都御史詳科貢

中順治甲午歲貢性坦率安貧博學強識凡先代掌故前哲遺踪以至奇書秘笈人所不及知者皆歷歷能道之嘗語人曰功名爲後品行爲先其自守如此終身弗變也子培字厚卿康熙癸卯舉人

黃應甲號爾先七歲喪父事祖母以孝聞少入州庠以貢生教習授知縣未仕卒性寬厚博學能文一郡碑序贊頌之作多出其手工字法書太學彝倫堂對聯上幸學見之稱善至今刊刻

猶存從遊甚衆著作頗多家貧未及問世

劉正廉字幼清明武德將軍整七世孫孝友謙和

能忍人所不能忍讓人所不能讓父母歿隨兩

兄哀慟情禮兼盡兩兄兩嫂歿皆殯葬從厚所

遺子女爲撫育婚嫁之鄉飲敦致賓筵謝弗敢

當卒年八十有八

子餘庇州庠生醇謹
端方孫濬州廩生

張秉彝號潞源一號汝南通州人性豪爽任俠才

力彊敏敢任大事武清舊有運船八百艘派役

通州且三百歲民甚苦多費冀得一首事者訴

於當事皆次且莫敢前明末秉彝毅然自任力

請當事以免歲省州人金以萬計迄今賴焉順

治戊子恩貢授江西吉安府經歷以幹力稱委

署贛之興國篆邑當兵荒之後民僅子遺田多

汗菜而徵餉者檄下如雨秉彝獨於催科寓撫

字焉卒於任民哀之

賈源字君逢號景洙嘗謁霍林湯賓尹叩讀書之

法賓尹教以絕去外嗜鞭心向裏專趨一路不

以異遷則明悟日益此由定生慧之理也如其

言習之往返道途雖驢背上亦手一編且行且
讀人或笑之弗輟也明天啟丁卯副榜順治初
以貢授盧龍縣訓導性醇謹樂易不設崖岸恂
恂君子也年八十五卒卒後四日生一子以嗣
其宗

任希尹字君聘明末壬午舉人 本朝歷任中部
知縣博學工文辭凡古今政教大端以及里巷
風俗山川土物莫不周知問與諸父老談壘壘
不倦蓋一代之文獻也沈毅有遠識能斷大事

解衆紛片言服人後進以文章就止輒直言開
導之迎養孀妹垂五十年終身如一日又賑卹
貧乏營建廟橋州守張公民望舉爲鄉飲大賓
年八十餘卒

田承武號仰泉其先以武功世襲指揮居通州性
孝友行誼端方善事父母教養弟侄門內雍雍
穆穆不以疾言遽色加人順治間舉鄉飲大賓
孫天培曾孫鎡皆州庠生

張士甄字繡紫號鐵冶汝濟曾孫也父文煥家世

孝友好施與以隱德聞士甄登順治己丑進士
選庶吉士歷官吏禮刑三部尚書凡爲會試同
考會試主考武會試主考各一皆稱得人纂修
聖訓及明史俱充副總裁其在刑曹持法平允務從
寬典在禮曹考據典故釐定加詳掌銓三載謝
請托疏壅滯公慎自矢士論歸之嘗奉使祭
恒霍諸山途遇山西裁兵散遣無所歸令當事
安插得所又河東鹽課積逋商人多賠累之苦
爲請于朝豁免之性謹飭謙和與人交藹然

可親至于獎薦人材必真知確見不肯輕徇也
致仕歸卒年七十八公舉從祀鄉賢子五人光鏞
丁卯舉人光鑾戊午舉人光鏊戊午副榜光鏐
廩生光鏐候補主事

楊正中惟治孫順治戊戌進士歷官禮部左侍郎
少有至性七歲喪父哀慟如成人事母盡孝將
娶而母沒或勸其從俗未成服而婚悲號拒之
原配朱氏以念其早歲食貧終身不再娶事從
父母盡禮生養死葬撫其遺孤子女如同胞又

通志
贈族人撫甥女教育同堂子弟俾盡成立助修
學宮捐貲四百金清慎自持不置田宅既貴顯
恂恂若儒素公舉從祀鄉賢

李含春字梅谷順治戊戌進士歷吏部文選郎中
遷鴻臚寺卿幼事父母如成人居喪盡禮祖母
愛季叔以本分田宅悉讓之季叔寓宣府病疫
一門六喪俱爲殯葬遺孤孫二延師誨之入庠
教育堂弟沛春滋春同登康熙壬子鄉薦年五
十無子妻馬氏爲置妾不納趣還其券令隨父

歸擇配嫁之初教授永平殫心訓士先理學而
後文章永平人祀之名宦累遷文選郎中選郎
例任一載上知其居官清慎特留三年蓋異
數也

李永達字質夫號裕寰州庠生明末爲張家灣守
備慷慨好義其姑李氏隨夫周文譽貿易寶坻
崇禎丙子城破李氏率子婦及女共六人俱投
井死永達爲斂葬于周氏祖塋戊寅道遇一避
難童子問其年曰十二問其里曰任丘縣問其

姓名曰李達憐之携歸撫養令與已子同學尋送還其家其家餽遺以酬却不受子涵另有傳

李涵永達子也字孩乙號蘊生順治丁酉舉人

世祖親試之拔前列歷任廣平府教授幼有至性十歲居張家灣兵至城陷而母潘病臥不肯頃刻離兵入憐其孝釋之及事繼母如所生撫養弟妹爲婚嫁得所殯葬其姊及姊夫教育堂弟入庠又好急人之難途次見貧民鬻幼女供逋賦哭甚哀詢實傾囊贈之不問姓名而去河南修

武縣富豪范某聘人長女既又聞其次女伴麗欲易之女父忿恨墜樓幾死涵遊屐適至聞之不平以告邑令立正其婚焉三任廣文皆持身端潔課士育才年七十致仕歸好學不倦越四十年而卒課子森發榮發俱入州庠有文名

張士標字伯建州庠生吏部檉芳之孫也性孝友接物謙和親歿廬墓三年中年喪偶義不再娶嘗拾遺金還其主好放生除道扶危濟困有婚喪不能舉者輒捐資助之歲荒出粟賑饑購良

藥以活病人設義學延名師以教鄉人子弟卒年八十餘子光銓孫泌俱州庠廩生

前元毓字子實州庠生明廬墓孝子必進之第三子明末荒亂家產盡亾拮据謀生仍奮志讀書遂入州庠孝廉王法湯見之曰此非終貧賤者以妹妻之性慷慨好施尤友愛兄弟一弟早卒一弟不善治生撫育其妻子四十餘年凡貧不能讀書及不能婚娶者多出貲助之藉以成名與完聚夫婦者不可勝數遣人埋枯骨日給錢

二百文又構橋梁戒殺放生設路燈于西水關橋以便行人課子最嚴有顯宦某夙受其惠欲爲其子夤緣入庠以報德元毓正色拒之初術者遇元毓謂其年止五十無子後乃生子五年至七十卒人以爲積德之報云長子培廩生字治也落落自好課子大有大年以繼家聲州守吳公存禮嘉其高韻贈扁曰香雪軒

李得春順治初以副將鎮沂州恤軍愛民晝夜防禦時西山土寇嘯聚如林士民遠避他所得春

通州元
訓練將士擐甲統衆勦叛逆撫歸附三年之間
東土宴寧百姓復業卒於任軍士念其遺愛泣
送絡繹孫維儀大姚知縣維倫考授守禦維佳
州庠生

韓元盛字心一順治二年授山西寧武關陽方口
守備修城練兵三載報最擢利民叅將兼轄兵
民恤疾苦除強暴百姓愛之時流寇餘孽竄伏
交城山元盛奉撫檄提兵勦之而宣府總兵姜
瓌忽叛一時殺官從逆者響應利民失守元盛

聞變還兵率騎直入爲賊所止脅降不屈扁之
別室而賊所役使多元盛舊日兵弁因共謀誅
賊次日挾利刃復與賊語奮臂殲其魁兵弁并
力殺賊左右賊衆股栗棄甲願受約束遂糾之
以恢復諸城和碩親王統兵入境元盛詣軍門
謝罪王署爲前部廓清賊黨以恢復之功贖失
守封疆之罪左遷衡州府都司僉書致仕歸一
兄三弟先卒皆殯葬之撫教諸姪成立親朋有
緩急以告輒應里居四十餘年接人以禮無少

通州志 卷之十 三
長貧富焉康熙乙丑州守舉爲鄉飲大賓年八十一卒子三人孫二人皆庠生長孫瑛丙子舉人

劉子振字麟長廩生歲貢善事父母潛心理學諸書爲文不屑作經生語屢赴舉場不第留意於天文地理占驗之學挾其精蘊里中有義舉輒以身先或請援例出仕答曰讀書而不遇命也奚必沾沾祿仕乎其於諸姪婚娶親朋困乏多出貲助之不存爲名附勢之心焉子台雋庠生

端方有父風台望貢生

朱璘字卜年號毅菴康熙乙丑歲貢家貧教授生徒取束修以養其親爲弟婚娶門以內雍雍如也性聰穎好學嗜古寒暑不輟貧不能置書籍嘗從親朋借讀屏居小樓不數日盡覽記誦不怠爲文博雅尤工古詩精天文地理音律諸學所著有離騷註釋類書旁解毛詩補音等書惜未行世汲引後學循循不倦以故及門多知名士焉

王元臣號養預州庠生磊落慷慨好排難解紛精
醫術明末辛巳大疫施方藥活人無筭熟於喪
祭之禮鄉士大夫皆延訪之課子先行誼而後
文章子簡之康熙戊辰進士現任南昌府武寧
知縣

丁大任字荷宇號重軒本州庠生文學風裕古道
可風一時知名之士多出其門墻孝友傳家同
居四世清介自持從不私入公門稍有請謁鄉
黨須皆重之舉鄉飲介賓者二次四寸爲之敦

請再三不得已始從父母之命壽年百有一歲
童顏鶴髮齒堅步爽見者無不稱竒學院胡公
簡敬給扁曰天錫眉壽通永道蔣公龍光給扁
曰百齡上瑞州守甯公完福給扁曰齒德兼隆
子志鴻本州庠生孫光耀曾孫楷本州廩膳生
風雅不群翩翩一世爲文古氣淋漓洋洋如千
頃波有古叔度之風皆由家學淵源用昌厥後
云

劉國璽字信圖號符宇係本州一鄉民壽年九十

有五歲自少至老醇謹自守孝友性成敦族睦
隣稍有餘蓄輒周人之急濟人之危鄉黨空乏
者須賴之抑且訓教子孫寬嚴並濟俾皆法守
勿替子三人啟元三元振元孫五人汴湛浩沛
江遵守祖教相好無尤曾孫十一人永年大年
引年係本州庠生彭年卜年舜年斯年長年盛
年有年逢年元孫三人士鏘士鐸士鑿五世同
堂交相推讓古傳張公藝不是過也世居城北
三里之馬家庄

殉難

明劉廷訓字式伯號弼寰先世自海寧徙通州崇禎
十年歲貢授河間府吳橋縣訓導十一年秋兵
薄城下廷訓與邑令畫地分守南城晝夜登陴
扞禦三閱月城得不破十二月二十八日復來
攻環城數匝勢重援絕士民悉踰城走廷訓知
事不可爲以幼孫增付僧隆貴使脫之餘悉棄
不顧垂涕誓衆衆爲感動三日夜卒無奔潰晦
日攻益急三面大擾邑令亦亾去而南城猶屹

立不動外兵飛矢如蝟洞胸血滿衣履猶束劍
曲踊已而連集六矢乃仆地死城遂陷比兵退
箭痕在胸歷歷也輿櫬歸遠近皆剪紙招魂迎
哭失聲上聞殉難獨烈贈學錄予祭一壇從祀
鄉賢廷訓雅嗜學結社西山終日據梧手口交
作或廣坐中呶唔不置或丙夜人寂一燈
熒熒猶口動鬚搖影注壁上好以善勸人若一
言偶誤輒蒸蒸面赤悔訟不自釋其矜愼如此

張樾芳號中柱汝濟第三子也萬曆丙辰進士由
行人擢吏部主事歷文選郎中公正自持尚書
趙南星推器重之魏瑞弄權急請告歸時里民

多被徭役破家甚至鬻子以應樾芳力陳當事
民困以甦崇禎間起文選郎中凡附逆瑞遷秩
者一槩澄清小人側目未幾告歸家置義倉以
備荒庚辰大饑疫設粥食之全活千計又以興
利除害爲已任然便於里民者多不便於衙蠹
甲申之變爲賊帥所執年逾七十炮烙拷鍛慘
毒備至抗節不屈罵賊而死聞者壯之君子謂
往古忠烈蔑以加矣

張文輝字仲文號闇生崇禎甲戌與兄文燧同登

進士累遷徽寧兵備副使時左良玉驕兵南下
禦之於蕪湖左師却蕪湖獲全改建南道移節
邵武隆武立閩中與吳春枝共設方畧丙戌三
月江西寇起杉關失守繫印於臂沉河死性孝
友事親色養備至第有遺孤撫之若已所出所
著有怡怡堂集行世時兄文炳在越聞變撫膚
曰吾弟死矣訃至果然則以平日自許信之也
娶楊氏守節尋卒子士舉有文名

唐嗣美字繹如號憶孺萬曆甲辰進士累遷山西

布政使性孤介蕭然壁立僑寓都門甲申見執
流賊榜掠慘甚含血喫賊以死年六十七夫人

支氏携子婦女婢九人死於井

詳列女

闔門殉節

婿劉爾崧載其喪悉厝於高麗庄祖塋

楊若桐號虞律惟清子淵源家學以選貢授睢寧
縣知縣潔已愛民報最將遷致政歸甲申通州
城破爲流賊所執不屈而死時年八十餘

李鍾英州庠生聞流賊破都城懷宗殉社稷卽整
衣冠自投於城內響聞河而死

田銀匠通州人不知其名甲申三月間流賊陷京
師懷宗殉社稷乃自投於水死君子曰此人當
與東湖樵夫竝傳

孝行

明孫雄通州左衛人事親色養不匱親沒廬墓三年
有司奏表其門

呂棟灤縣永樂里人嘉靖間歲貢任桐栢知縣事
母周氏曲盡孝養每飲食必親嘗而後奉之子
孫在庭帷者凡五代日率之以娛悅其親母享

年九十有九棟亦壽至八十知縣李成旌曰斑
庭頤養邵致誥旌曰節壽雙高

苗必進通州人少孤事母鄭氏以孝聞鄉里稱之
無間言母歿廬墓三年日持筐添土三次夏不
扇冬不爐大雪三尺獨不及其廬每夜有二犬
爲之守明旦即去不知所自來禽鳥馴狎翔舞
于側人以爲皆孝所感云知州楊忠裕親迎郊
外旌之日廬墓孝子時萬曆四十年也

張士壽字平格號山公州庠生吏部郎文燧長子

通州志 卷之十一
甲申之變吏部先請假里居奉其父母匿他所
孝子留都守邸舍都城陷賊遍掠縉紳家大索
吏部跡及孝子孝子恐賊或脅滅獲而洩其父
匿所則并大父母無以全遂毅然出謂賊曰我
實張吏部子笥我主之任汝曹取勿譁也賊
帥搜括僅中人產見孝子神采奕奕釋之居數
日又一賊繫去拷索百至誘攀親族可貸出貲
者以緩其命孝子大呼曰死耳終不以戀喘息
累他人遂嬰賊刃死於崇文門內之關帝祠先
立石墓道題曰張孝子墓

一日孝子知賊必不釋已遺言致吏部毋爲兒
傷大父母春秋高傷兒恐爲大父母感吏部聞
其言益慟賊退吏部往殯之瘞於張家灣祖塋
龍蹈其先自南昌徙通州有至性事母盛氏色養
備至友愛兄躍終身無間言撫兩姪如子兩姪
早亾常賑恤其家外家家業日替凡中表翁妹
二十人各有贍助皆體母意周恤之也母年七
旬病篤蹈夜露禱願減已算以益母母聞之曰

汝年四十無子可減算乎既而曰汝既發此心
我增年而汝生子未可知也未幾母病果瘳三
年生子時化又三年生子起化年七十而卒子
起化天啟甲子舉人州守俞孔震嘉其孝弟贈
扁曰儒門高隱起化之座師宋僉都贈扁曰節
孝裕後

楊定午 州庠生崇禎間父病劇午禱于神願以身
代無已割股以進知州旌曰孝可維風學

正旌曰
真孝子

皇趙如蛟 州庠生隨父宦河南父病篤如蛟計
無所出跪禱于星月下割股進之

潘應科字次山始祖貴以軍功世襲自山東平山
衛千戶遷通州因家焉孝友性成曲盡事親之
禮父安病廢寢食跪禱日夜不休親黨聞而稱
道之蹙然曰吾將爲名乎其誠篤如此好濟人
緩急或負之嘗曰焚券乃自高以愧人吾弗爲
置之可也助人婚葬終身無德色年八十餘卒
子鉉字文鼎例監生聰穎嗜學凡經史子集莫
不淹貫有執經問難者輒傾心開導獎勵後進
士論稱之其慷慨施與有父風年七十二朗吟

淵明詩而卒鉉弟鉞廩生子淑庠生

王好善

州民常封肉以療母疾署州事
奚公祿貽給扁曰東漢遺風

吳光豫字介石號嵩雪父允昇自徽之歙縣徙通

州歷官按察使光豫少有雋才從軍湘南以功

授攸縣令致仕歸博綜經史工五言古詩繼母

汪淑人無子守節光豫迎養之和氣婉容先意

承志妻李氏亦賢淑佑夫事姑最得懽心汪殆

忘子之非已出也嘗侍繼母疾親嘗湯藥夜分

不寐母曰婢妾在何勞苦為答曰非是則兒心

不安所著有潭州集四卷早卒子峰太學生體

父志善事祖母以孝友聞

王文輝

州民荷擔養親凡時物初市必售歸以供
甘旨早出暮必歸以免親憂母疾嘗糞又

割股療疾州守李公會
生給扁曰一念可推

王永爵

州民少孤母守節竭力事之母病篤割股
以進尋愈州守王公光謨給扁曰孝思可

風

陳可嘉

祖母病篤割股進之州守王
公光謨給扁曰孝義克彰

劉正忠字弼五州庠生有至性幼居父喪盡禮如

成人事母出入必告母食乃食母寢乃寢時物

初市若未以奉母雖親朋宴飲不敢嘗友愛其
弟不私已財母亾哀痛數日嘔血而歿

子餘社
庠生孫

源清曾孫
弘志庠生

馬國武

割股療親疾州守王公
光謨給扁曰節孝一門

陶淑

割股療叔疾州守吳公
存禮給扁曰敦倫風世

義行

明武金曹璉張欽皆灤邑諸生也正統巳巳英宗北
行巳而也先遣使送還京師震恐詔募勇敢士
三人憤甚應募曰何至被敵欺凌若是時敵至

張掖門恣意悉索三人奉旨拒之敵馳去賜三
人國子生後金仕至處州知府璉仕至撫州知
府欽仕至前軍都督府都事

韓鵬定邊衛千戶其家六世同居有司奏表其門
耿從州民正統間輸粟五百石以濟時急詔旌之
韓維城通州諸生崇禎間吳巡撫鎮密雲差役解
官餉入京渡東門外河遺所賚銀及文書維城
拾於渡所候久之有倉惶至者拊膺而悲則前
遺金解役也訊實還之役拜謝而去

褚時中通庠生性剛直以攻冒籍忤州守守啣之
會其姻有訟事遂羅織時中遣戍而死侍御馬
經綸爲立石曰時中義士也以攻冒籍而觸當
事者之怒罪不至死而竟置之死且死不歸屍
故招其魂而葬之

王可成號次槐通州人爲工部文思院副使慷慨
好施天啟丙寅大水多餓者捐貲助有司施粥
崇禎時歲荒橫尸衢巷請於當事擇地埋瘞施
棺木蓆箔無算買房十餘間於南門外以棲乞

丐間施綿絮殭者得免已巳張灣城陷死於兵
者遺骸狼籍請於工部郎董中行以埋張灣北
門外蓮花池中不下千餘人時出家財以犒守
城軍士他若助親友婚喪事甚多也至今里人
稱之曰王善人

賈以祿字泰榮通州諸生甲申之變欲倡義雪國
恥因以大義曉其妻令飲藥以絕內顧

妻飲藥不死復

自經詣懷宗梓宮前拜伏痛哭賊亦義之不殺也
已偕弟以壽仗劍南行授監紀南都亂以祿間

行至廣德州州人以其貌類馬士英誤擊死其僕李讓亦被劊絕三日而甦若有呼之起者葬其主而還以壽爲浙江蕭山令有惠政

皇清

張定芳字子發通州庠生順治十八年隨師劉正遴任廣東吳州丞正遴歿定芳負其骸骨行八千里歸葬於通

李希賢號少川先世嘗以功封萬戶侯久之失職家中落希賢服賈數年盡復其產嘗貸金於人不能償者卽置沸閭里人吳某負其貲五百

金家貧欲以妻償之希賢遂焚其券陳自良爲希賢任出納有宅三區金二百餘仟何卒希賢俟其子長授產與金遠近稱爲長者康熙癸卯州守張公民望舉爲鄉飲賓劉公應時禮致如前俱謝不敢當卒年七十有八子達例監生孫準洵俱州廩生

李養榮號小峰吏部含春之父也孝友任俠好急人難凡里中訐訟庭斷不服者一言罰之皆帖然人比之王彥方云其弟養貴年四十餘乏嗣

通州志 卷之十一
為置一妾養貴嘆曰以年老誤少艾吾弗忍也
遣之後舉數子有名滋春者康熙壬子舉人

劉澤弘食貧教授崇禎甲申流寇陷京師偏拷諸
縉紳家掠其財時有二友以宦裔將見及投止
無所澤弘潛引匿于家得免於禍

康承錫字荷九號仁所世襲通州衛指揮父西泉
由廣寧衛徙通州初承錫乏嗣明崇禎壬申買
妾孟氏詢其有故夫在立遣還之未幾二子生
長莊順治甲午舉人兵部督捕主事次政康熙

壬子拔貢

田大祿

號龍泉通州人性樸直好施里中無不知
有田舍人者順治初嘗出米數千石以賑

饑民又施棺以歛疫死者朝廷嘉其好義命
巴大學士表其閭城東橋駕運河之上久圯難
行爲撤而新之而城南哈叭橋城西護城河橋
及兩岸堤堰皆出貲繕治兵備道蔣公三捷贈
額曰功高利濟兄弟二遺子二女二撫若已出
婚嫁之復析產均分姪與子無異焉兩舉鄉飲
賓諸孫濟濟有聲庠序間

王氏

郡民馬從善妻年二十九夫亡苦節八十七
歲卒子宗仁昇夢魁夢元四人昇字龍江性

至孝初見母無依因淨身入司禮監以供其
膏篤愛昆季兼善友朋年至七十八歿時姪太學
生呈瑞侍諄諄訓以孝友鄉黨高其義呈瑞葬
之盡禮瑞夢元子也父子俱友于好義又王氏

孫有德早亡妻馬氏年二十五孀居三十餘年卒一門孝友節義皆王氏守志之報也

吳承錫字康侯始祖俊以武德將軍自河南汝寧

徙通州少為諸生父命出嗣堂叔時州里僉派

供用庫役費輒千萬計嗣父名在僉報中百計

脫之復派東河經紀害與供用庫等亦力圖以

免崇禎壬申州守李一爵良吏也為匿名所中

被劾褫職承錫率同學力白其誣復原官順治

己丑撤回臺軍八百名留駐通州奪民房以居

比屋大擾承錫倡議按戶捐貲買房五百餘間

處之闔郡始安姪邦翰六歲喪父承錫撫若已

出教之成立登康熙戊午鄉薦任滄州學正

張化光

州庠生國初旗人佔奪民地化光倡眾

爭辨旗人畏其剛直賄囑之令勿出化光

日死則死耳肯貪賄而賣士民乎辨愈力旗人

誑控當事陷以大辟將死與妻訣曰吾生為義

士死為厲鬼任爾他適可也妻曰君為義士吾

願為節婦化光拜謝死後擊殺旗人其妻食言

他適亦擊殺之其英烈至今凜凜云

王國相

字君甫郡民王應武子也性孝友慷慨幼

喪母哀痛欲厚葬事父承權八十年如一

日常出已貲三百餘金以贖盛姓莊姓之悞罹

旗下者俾之室家保聚其好義濟人多此類他

流寓

李禿翁名贄字宏甫自號卓吾老子溫陵人外冷中燠強力任性以舉人歷姚安知府輒至伽監判了公事入雞足山關藏不出御史劉維奇其人令致仕歸所著有藏書焚書說書之屬多出己意雜詼諧又有南詢錄龍溪集三教品道學抄明燈錄數十種傳於世性癖潔惡近婦人讀書不以目使人高誦旁聽之好掃地滿浴日教人膺帚具湯不給鼻畏客氣客至一舉手卽令

遠坐搔髮自嫌蒸蒸作死人氣遂薙之晚棄家遊楚交袁中郎兄弟客麻城與梅國楨友善愛龍湖風土築芝佛院以居梅氏女曰淡然就翁問佛法翁容接之爲作觀音問三篇會有與梅國楨構怨者指翁異端宣淫遂火其廬逐之使無所容州人馬經綸冒雪走三千里晤之於龍湖偕寓商城黃蘗山中迎歸通州買迎福寺基創塔院佛宇居之日與談易每卦千遍一年而九正易成給事張問達指爲妖人被逮詔獄馬

經綸力辨其誣事漸解翁忽自刎年七十有六
在獄作絕句云年年歲歲笑書奴生世無端同
處女天下何人不讀書書奴却以讀書死經綸
哭曰先生妖人哉有官棄官有家棄家有髮棄
髮其後一著書老學究其前一廉二千石也收
葬迎福寺側焦竑題石曰李卓吾先生墓黃梅
汪可受爲之記

袁中郎傳畧曰翁之爲人真有不可知者本絕意仕進也而專

談用世之畧本狷潔自厲人也而深惡枯清自矜刻薄瑣細者本屏絕聲色人也而於花月兒女之情狀極其賞玩本多怪少可人也而於一長一藝傾愛注慕自以爲不如本息機念世稿起涕淚橫流痛哭

滂沱而不自禁

李三才字道甫號脩吾父某由陝西臨潼徙居張

家灣嘗買一舊銅器剔視之金也輒還其人三才中萬曆甲戌進士尚未娶有友招妓侑觴歸語家人曰友太欸洽飲我乃出其內人其樸如此授戶部主事以救御史魏永貞外貶視山西學政終任無敢以隻字干者擢鳳陽巡撫劾稅監陳增請罷礦稅疏凡三四上乃逮稅璫勘問

捕斬徐州礦盜趙古元及亳州盜李大榮等遷
督漕治河副都御史疏請致仕上以爲推托聽
其去南北臺省多具疏乞留史學遷疏畧云上
以三才爲何如人哉乃招之不來麾之不去好
善嫉惡不避怨不辭勞蓋社稷臣也方今礦使
四出蠶食鯨吞三才獨立其中威不得脇勢不
得驅薄海內外望如景慶一旦以推托去之非
其罪矣說者謂上爲陳增而去之耶夫今按撫
地方擔當大事非三才孰可者苟容悅者雷強

立者去朝無正人則群惡鴟張賢人去國則豪
傑解體非所以抑奸邪扶正氣重邦本備緩急
也上覽奏省悟仍令供職又疏陳民情國計之
危殆兼慮遼左情形請增兵發帑淮徐大水繪
圖疏請截漕以賑及緩徵各項錢糧去之日民
立祠祀之時浙黨徐兆魁等排擠正人三才實
爲東林首雋乃上疏曰東林顧憲成講學之所
也從之遊者高攀龍等束身表表何負國家哉
疏出浙人益憤恨三才乃屢疏乞休歸建雙鶴

書院講學其中後復起爲南京戶部尚書性慷慨好施急人之急卽囊無一錢意氣可千金許嘗語人曰我一點俠氣未銷蓋定評也與趙南星友善時稱北李南趙所著有雙鶴軒詩集灼艾集無自欺堂稿誠恥錄行世

皇清

陳天衢名善道杭州人伉爽多巧思少遇異人授以規矩圖說兼以器遺之自是巧思洋溢能作奇器嘗應大貴人名卽辭病歸曰吾不能俯仰事人也家貧以所作儀器易薪米自給有餘輒

以濟人年八十餘視聽不衰或問之曰唯寡欲耳子身來寓四十餘年州人多稱其高致

列女

明韓氏定邊衛千戶韓景女年十八贅錦衣衛舍人湯全爲婿方半載全從軍陣亡韓誓不再適家止有弟韓璵年七歲撫之度日孀居三十餘年天順六年有司奏旌其門

吳氏名淑廉州庠生孫祿妻祿寢疾吳視膳進藥曲盡調護前後八年尋病篤吳慟曰夫有嗣吾

通州志 卷之一
為夫後活也今且死無嗣吾何以生為乃悉出
篋中金珠衣帛散之娣姒親舊卽絕食親黨累
日涕泣強勸之終不聽且曰與其後夫死不若
先夫死迨其見吾目瞑矣一日覺神氣有異乃
起沐浴更衣甫畢遂絕後十餘日夫亦卒正德
丙子有司奏旌其門

葉氏浙之蘭谿人嘉靖中適神武衛舍人許紳紳
家故饒於財以任俠蕩廢携葉出投所親途病
死於舊城西門外葉守尸晝夜悲號州人哀之

或餽飲食或遺金帛或欲其改嫁以葬故夫俱
却之不聽水漿不入口者十有四日竟死尸傍
年纔二十餘州人爭為買棺鬻地合葬之適巡
按御史錢學孔持節按通親見之具疏以聞事
下禮部尚書夏言甚義之為具覆詔命立祠旌
表有司春秋致祭禮部侍郎李廷相銘其碑
張氏定邊衛指揮吳鉞妻年十八夫歿堅意守節
至六十一歲有司奏表其門嘉靖間人也

盛氏明錦衣衛校尉龍鍾妻年二十八夫亾晝夜

痛哭誓與俱死時孀姑張氏守節多年二子躍
蹈俱幼母勸之曰汝死誰爲事姑育子者乃強
起操家家貧甚奉姑盡孝教子以義方苦節六
十餘年年九十而終萬曆間州守吳來庭高位
俱給扁旌之一曰雙節流芳一曰九旬完節崇
禎十三年督學吳道昌奏旌其門次子蹈詳孝
行中孫婦彭氏孫妾張氏俱守節另有傳

彭氏龍時化妻年二十二夫亾矢志堅守教子命
保成立長入州庠苦節四十年年六十二卒

張氏無錫教諭龍起化妾也起化在無錫以身率
士卓有政聲明倫堂刻碑贊之曰清直謙厚至
今尚存崇禎十六年遷國子監學正時大疫起
化及妻袁氏并二子庠生命相命佐輩內外凡
三十餘人俱死僅遺兩幼子命延命錫張氏年
甫二十四二子又非已出乃矢志撫孤教養成
立後命延入州庠早卒命錫今爲州廩生命錫
子灑亦入州庠則龍氏一綫張實延之卒年六
十戶部郎中宋公之儒旌之曰閩內伊周州守

于公成龍旌之曰柏舟雅操

張氏山陰儒士柳廷元妻徙居通州嘉靖間廷元病篤恐其弟廷政凌之囑張曰兒女幼爾又少年不如改嫁以存孤張聞卽欲自盡以明志廷元曰吾恐爾母子難以自存故云爾果能撫之吾目瞑矣廷元歿時張年二十七廷政盡奪其家貲逼改嫁張乃携子女別居紡績自給久之爲子女婚嫁苦節五十餘年年八十二卒曾孫國棟句容縣丞元孫星耀監生授州同

單門三節

蘇氏

姜氏

蘇氏敬之女進士單鉞配姜氏鉞之妾單氏鉞次女也鉞家張灣嘉靖癸未進士歿時蘇年二十六生二女無子慟欲自裁因姑老而妾姜有身忍死待之以遺產付夫之弟鑾字其長女於都察院楚人賈啟之子某字其次女於刑部郎宣城張乾之子正甫守節五十餘年年八十而卒蘇媵妾姜氏鉞卒後六日生一子八歲而夭姜年少蘇憐之令他適姜泣曰母何言也夫節義

何常惟人所蹈吾奉母終身得同歸單氏之塋
于願足矣豈謂婢子遂無至性哉妾志已決母
無復言蘇乃禮之若妯年七十餘而歿蘇次女
單氏歸張正甫於京邸未三年而正甫歿旅襯
南旋單氏依其母以居一日謂母曰見張家婦
終當歸張且婿墓已宿草而我未一展拜心且
夕怛怛然何能久侍母也辭歸宣城未幾卒里
人楊尚書行中作單門三節傳紀之

汪門雙節

徐氏
謝氏

徐氏謝氏皆副使岑應春妾也應春本姓汪歿時
以未復姓爲恨二氏年方少撫其嫡王淑人所
遺孤光緒守節三十餘年教養之自孝廉歷官
監司已出家譜示光緒請復本姓成父志提學
御史左光斗具奏禮部尚書林堯俞覆云二氏
分忝綠衣志堅白首痛夫早逝厲苦節於卅年
督子歸宗復本源於一旦閨閣旣罕媵妾尤稀

詔旌其居曰一門雙節

附翰林黃景昉詩因憶
范文正當年舊姓朱負

臣終類我寡鵠互將雛參昂星雖小白
嬰趙不孤鳳毛今五色刷羽在天衢

林氏州庠廩生劉杞芳妻生一女夫歿林年二十
慟欲殉之每瞠目咄咄若與夫語者姑抱所生
女強勸解之林泣曰吾喪所天此呱呱何益也
絕食二十一日死於夫柩旁巡按御史奏旌其
門州人馬經綸誌其墓

文載藝
文志

賈氏生員郭登科妻登科早卒賈卽欲死殉因遺
腹未娩姑隱忍及產一女遂自縊柩側詔建坊
旌之題曰千古流芳

華氏生員陸大經妻萬曆三十八年夫歿無子華

慟曰何以生爲遂絕粒九日而歿詔建坊旌之
馬氏戶部尚書李三才妾三才卒氏不食者十二
日死於喪次時天啟四年二月也是年四月又
有呂家灣陳氏

陳氏呂家灣諸生呂完聲妻完聲疾亟召族人囑
以後事族人畢至以妻在側不卽言陳心知其
爲已也出戶外夫乃言曰吾旦夕且死婦少無
子我不忍其惻獨語未竟陳遽入問適語云何
夫不應陳曰我耳之矣請自今君一飯妾亦一

飯君不食妾亦不食與君俱耳未幾夫卒陳不食十四日死於夫之柩側太常彭端吾聞而嘆曰不三月間而有兩烈婦古云慷慨殺身多出於燕趙乃今知不獨丈夫然也以其事聞於巡按御史彭鵬化奏旌其門

翁氏張家灣民徐九德妻明崇禎己巳張家灣城破九德被難氏匿神龕中自縊死

趙氏生員丁大志妻崇禎己巳張灣城陷所生女被掠氏往奪之手指盡砍落遂被殺

張氏袁希點妻亦張家灣人聞城將破先令三女俱縊旋自縊死

王門雙節

胡氏徐氏

胡氏通州人年十六適州民王化浹年二十三生子謙德甫三月夫亾氏哀號絕粒舉家勸之曰此呱呱兒何以自活願少忍撫之孤存卽夫存也乃勉爲一餐謙德少長教以力學年二十入州庠未幾亦卒氏乃偕媳徐氏養孤孫以繼夫祀年八十七而終撫子育孫苦節六十五年明

崇禎時督學御史吳道昌奏旌其門

楊門三節婦

馬氏
雷氏

蔡氏

三節婦者皆吏部尚書楊行中之孫婦汜水令鎬之子婦也馬氏聞道先生經綸第三女幼稟家教好讀書通大義歸楊鎬第三子生員世昌夫卒氏年二十三撫其子辰生冀成立年十五又卒悲哀幾絕乃誦佛書茹素終身嘗曰吾每觀儒書不入觀佛書則入以所歷皆苦境故也州守楊聯芳旌之曰柏舟賢節 本朝順治乙未

卒年七十五守節五十二年蔡氏刑部郎成已長女歸楊鎬第四子生員世喬夫卒將以死殉家人共解慰之不從夫第五弟世顯曰嫂賢如此聽其死則不忍無子勸之守促之死耳會第六弟世法妻許氏卒遺子嶽生在襁褓世顯乃語弟世法共舉以昇氏且曰今既有子可勿死矣氏遂撫之如已出嶽生既長名宏入州庠崇禎丁丑氏卒年五十守節二十八年宏將爲主喪夫次兄世揚不許曰宏爲世法長子禮不得

爲他人嗣弟世喬非宗子又不當立嗣遂奪氏
所遺產以自殖後宏改名舟 本朝康熙己酉
登鄉薦雷氏五臺令應科季女歸楊鎬第五子
生員世顯世顯多才能孝友善論事理次兄世
揚有文名然憚其正與語每心折焉早卒氏年
二十九撫其子宗教之成立治家嚴謹操縱有
丈夫槩門內外寂靜無詬諍聲 本朝康熙丁
未卒年七十一守節四十二年子宗入庠後改
名宗最循謹蓋遵母教云

支氏布政使唐嗣美妻誥封夫人也崇禎甲申流
寇陷都城嗣美殉難夫人率子婦女妾九人同
投井死

提氏刑部侍郎河間提橋女適大學士魏藻德長
子繼標崇禎甲申流賊陷京師繼標殉父難氏
慟哭欲絕家人勸之曰夫柩未返可遽死乎及
翁與夫之柩歸權厝城外氏往哭之卽止不返
時土賊蠡起乘亂劫掠家人強之歸氏曰旣欲
我歸可迎靈位於家朝夕得奠食也家人知其

通志
卷之十
三
意欲殉之相與防護甚嚴氏日強語笑如平時
久之防者懈氏詭病夜常數起以誤衆人一夕
嚴粧綴竊出跪縊於夫之靈前而死年纔十九
時六月十五日也越三日入殮伏暑中顏色如
生兩膝終屈不伸其父聞之來省爲弗哭也者
而曰此真提橋女也

張氏生員王大治妻生子立極而大治卒氏年二
十七卒哭後自矢於夫之靈曰願佑此三尺孤
以蕃王氏循且願未亾人他日得歸骨王氏之

先壠吾志畢矣卒年六十有八崇禎間兵備道
王鰲永旌之曰節慈裕後知州楊聯芳旌之曰
白首孤燈

劉氏州人王賁德妻嫁三年而寡年纔十九誓以
死殉時有遺娠兩月家人解之曰倘天不絕王
氏幸而生男則祖宗血食於是乎在殉夫死不
若延夫祀也強舉饘粥彌月果生男凱撫之成
立入州庠氏乃慨然嘆曰今而後可見夫於地
下矣遂哀悴卒

王氏 吳濟妻事蹟莫考舊志稿所載仍存之

高氏李茂齡妻夫亾絕粒七日自縊柩前明崇禎

十三年兵備道羅國華遣官致祭 本朝順治

元年州守李公廷梅給扁旌之曰貞烈可嘉

李氏鄉民馬萬全妻年二十六夫亾家貧甚矢志

堅守事姑吳氏以孝聞子德裕甫二歲撫之成

立苦節五十四年今已八十尚存州守吳公存

禮旌之曰柏舟矢志

王氏生員張鵬翮妻鵬翮遭流寇難死於非刑氏

年二十六聞夫亾隨自縊家人救而蘇時子甫

九歲家業盡喪氏堅志苦守雖饑寒交困弗變

也守節四十四年年七十而卒

趙氏生員王來試妻年二十七夫亾家貧子幼嘗

三四日絕食里隣憐之餽遺輒却不受苦節四

十八年而卒

子道興事母有孝名孫廷弼廷貴廷璽廷諫皆成立曾孫十二人人

皆謂守節之報云

潘氏張家灣守備李永達妻廣平府教授李涵母

也姑病胃不能飲食氏乳之一載又侍奉湯藥

通州志
朝夕不怠三年如一日姑病愈氏積勞成疾崇
禎庚午年僅三十六卒親黨以孝稱之

莫氏張灣民于繼倫妻順治四年夫亾家無擔儲
所遺三子皆幼氏食貧撫之俱成立守道蔣公
龍光旌之曰荻丸貞行州守劉公應時旌之曰
母道女宗

黃氏年十三適生員華國爲繼室國年老嗜酒家
益落或日中不舉火氏甘之國多疾幾殆氏日
夜侍奉不衰國常飲酣語人曰吾婦雖女子有

丈夫氣吾一旦不諱是必與我同歸者衆竊怪
之一夕國痛飲歸疾大作翌日卒氏哀慟曰天
乎吾侍君七年意常憂悲念君老也今君果舍
我逝矣遂絕粒卧柩旁十有四日而死年纔十
九州守胡公朝賓往省之爲下拜順治六年已
丑葬城西觀音寺西北數武會除道自京師抵
州葬當其處墓遂築道中

湯氏明通州衛千戶孫如林妻也年二十六夫亾
遺子德光六歲又子一女一皆幼貧困日甚迫

於饑寒氏矢志守節及德光長襲世職季子又
中武鄉試氏年七十有七疾革呼二子曰爾猶
記父喪後併日而食時乎若非吾苦守爾兄弟
安有今日幸見爾成立可以報爾父於地下無
媿也遂卒順治十二年乙未督學翰林院侍讀
程公芳朝旌之曰節凜冰霜

章氏貢生黃應甲祖母也年三十餘夫故矢志靡
他卒年七十一順治十七年州守于公榮旌之

曰節壽

任氏

州人馬錦妻明孝廉希尹妹也四歲父母俱
喪十六歸於馬奩贈蕭然因失愛於姑夫父
不善治生家益落夫亾子幼堅志撫孤姑及妯
娣詬侮之悉隱忍受明崇禎壬午兄希尹舉於
鄉迎養終身卒年七十有三苦節垂五十年里
人稱之曰氏固貞婦也乃孝廉之友愛亦足多
也昔李勤念姊病老親爲煮
粥火熱其鬚任君殆過之矣

朱氏

明御史馬經綸之孫本朝武進士柄之妻
也湖廣荊州遊擊朱光煥之長女生而端嚴
言笑不苟于歸後夫妻相敬如賓奉翁姑以純
孝稱夫卒氏年二十六歲勺水不入口者數日
誓從夫死因長男騏方六齡次男士襄尙在襁
褓鄰里爲之勸慰不得已而後食孀居三十五
年艱苦脩嘗冰操愈厲惟竭力課子今騏候選
府通判士襄候選主簿皆母氏教育之功也

王氏孝廉公擢之女曄之妹也適同郡雷森順治

通州志
戊戌武進士授辰州守備中道病歸數年益甚
氏嘗藥呼天請代森死氏亦欲死父兄慰之曰
以死殉夫烈矣其若子女何開諭至再始進勺
水自是生計日困家無擔儲寄食母家備嘗艱
苦其志堅守篤終身如一日也

李氏幼喪父其母欲改適以氏配營卒康虎虎弟
頑劣無賴每伺虎出輒調之清明墓祭歸虎中
途他往獨其弟隨氏至家持刀脅之欲姦之氏
不屈號泣出訴竟爲所殺事發官抵其弟以死

罪

一門節孝

楊氏
侯氏

楊氏火堡村民劉循瑞母侯氏劉循瑞妻也順治
初循瑞幼孤楊守節撫之及長娶媳侯氏婉順
盡婦道姑病篤思羹侯氏割肉調汁以進姑嘗
之立愈州守甯公完福旌之曰一門節孝

劉氏弘仁橋民黃鼎新妻姑楊氏病篤已無生理
氏焚香籲天割股進之痲疾頓瘳

張門雙節

陳氏
馮氏

陳氏明仁聖太后姪孫州廩生張一龍妻馬氏知州張元玉妻姑媳也一龍生子元玉而卒陳氏年甫二十七守節教子元玉娶馬氏崇禎壬午舉人授山西忻州知州亦卒陳偕媳馬氏撫孤孫起敬長入州庠陳氏卒年九十餘馬氏事姑以孝聞與姑同志康熙初守道錢公世清州守寧公完福同旌之曰一明孝節曰雙節流芳

王氏明崇禎丁卯舉人羅應星妻善事舅姑二十六歲夫亾守節甲申以後家計日落備嘗艱苦

教子弘鑿成立爲州庠廩生氏年七十三卒

翟氏儒士胡宗禮妻王氏生員胡國政妻姑媳也

翟生子國政夫亾守節國政年十五入州庠娶

王氏生子其偉八歲而國政亾王氏年甫二十

七姑媳共撫一孤翟年八十二卒王年七十三

卒其偉亦庠生

林氏年十九歸儒士王世麟年二十二而寡子弘

緒甫生撫之成立繼姑臥疾八年奉侍不衰以

孝聞

王氏謝立賓妻家貧甚隨夫寄食于其叔謝文周家立賓將遠遊與氏訣曰我去無歸期子幼不如改適氏哽咽不能答時年二十六長子崑甫二歲次子岳夫出逾月始生其夫之叔與妻令氏改適不從雖迫饑寒弗悔也教兩子皆入州庠苦守二十二年而卒卒之次年立賓始還家父子相見不相識氏乃有夫而守嫠可謂奇節矣

汪淑人徽州士人大保季女按察使吳允昇繼妻年二十夫卒諸孤皆非已出撫之如所生出盡教養區畫田宅持家有大體尤憐愛少子光豫與之同居光豫亦色養備至別有傳載孝行中及光豫卒又撫孤孫峰成立備嘗艱苦百折不回今年七十現存守節已五十年識者謂無子而矢志終身撫孤而鞠育兩世在節母中爲尤難得云乃因已受封誥莫爲之題請建坊以旌其閭蓋闕典也

彭氏癸卯孝廉授濬縣知縣王業昌妻七世祖椿

從明太祖戰鄱陽食邑遼海祖士弘以孝廉知
南宮縣死流寇難氏幼貞敏讀書通大義祖將
殉難顧之曰其若汝曹何答曰女聞國而忘家
也夫早卒氏年二十有八撫二子一女教養成
立嘗曰行險求裕不如任誠無爲康熙二十八
年 詔旌其門二子皆太學生長爵博學能文
次鴻事母盡孝氏嘗病篤鴻嘗糞少甘則哭又
工書法至今兄弟友愛以娛其母女玠通詩書
適士人吳峰蓋遵母教云 已載一統志

金氏無極教諭彭爾齡妻性貞烈善持家夫少貧
困或勸其逐末氏獨以讀書勵之夫病篤藥餌
不效夜禱北斗願減己算二十年益之又割股
肉以進病果瘳後爾齡出仕歸卒時恰二十年
人皆謂至誠所感云子延稹太學生以詩書世
其家

李氏孫光繼妻年二十八歲夫亡撫前妻之子紹
先成立苦志守節四十餘年卒年七十五學院
顧公藻州守王公光謨俱給扁旌之

賈氏郝桂茂妻年十四歸郝十五夫亡撫遺腹子
志秀織紡自給苦節垂五十年今六十有三歲
現存學院顧公藻州守王公光謨俱給扁旌之
康氏名流著康武寧之女字州人張經未嫁聞夫
故欲往哭奠父母阻之遂整衣歛容從容自縊
距其夫死纔三日時年二十一歲撫院郭公世
隆旌之云烈壯山河守道邵公嗣堯旌之曰未
識夫面欲殉夫亡從容就義日月爭光州守王
公光謨旌之曰生無一夕之懽非耽于情也夫

家貧無立錐非慕其富也父母愛養非迫于勢
也生于市井非嫻于教也乃從容以死毫無瞻
顧真女子而烈丈夫矣因給扁曰千古完貞

張氏李騰祥妻家貧甚夫餬口遠方客死骸骨歸
葬氏年二十七撫骨一慟幾絕時長子國福方
八歲次子國斌方週歲女紅給食倍極艱辛其
夫之弟百端毆詈絕飲食以逼其改適氏惟閉
門飲泣至死不回苦節四十餘年七十歲卒州
守吳公存禮旌之曰節苦貞全

楊氏東鄉寨里人明神武中衛指揮僉事王邦正
次子起蛟之妻夫卒時氏年僅二十五母家慮
其年少氏矢志靡他治家嚴肅守節四十八年
教養三子俱成立長永福順治甲午副榜

黃氏明指揮李應魁妻年二十八夫亡三子俱幼
遭流寇難家產一空惟以女紅自給雖迫於饑
寒弗怨也教子成立守節三十四年而卒孫鐸
郡庠廩生鉞附學生曾孫師沆師泌亦入州庠
馬氏張家灣民洪應元妻年未二十夫亡持身嚴

肅不履戶外守節三十餘年卒年五十一學院
朱公阜旌之曰操司冰潔州守王公光謨旌之
曰潛德幽光吳公存禮旌之曰瑤池冰雪

劉氏生員徐貞勤妻年三十夫亡矢志撫二子教
之成立守節四十餘年今七十有六歲無恙也
州守王公光謨旌之曰柏操松齡吳公存禮旌
之曰純孝完節又爲詩以祝其壽云子通太學
生事母色養備至遠近稱之無間言

李氏生員張耀祖妻年十六適張十九夫亡慟不

欲生教子祐讀書母少怠長入州庠爲廩生守節二十六年年四十五臨卒詔其祐曰吾今可以見汝父不愧矣汝宜益奮志以振家聲也

伯氏生員杜芳華妻明錦衣衛千戶伯世感女也夫病甚久侍奉湯藥不懈及卒氏年二十八哀毀不食將以死殉家人泣勸曰舅姑老二子幼其若俯仰何且有遺娠幸生男庶多延杜氏一脉也踰八日果生男矢志撫孤不窺戶外事舅姑盡孝教三子成立守節四十餘年卒年七十

三長子馥廩生次馨貢生季穉卽遺腹子亦入州庠

路氏州人王瓚妻年二十二歲夫亾跪哭三日將以死殉時瓚父年踰七十子秉信甫九歲親黨以大義勸其事翁撫子氏忍死守節三十餘年今年六十歲尚存

周氏高敏政妻年二十三夫亾痛哭絕粒死而復蘇教二子俱入州庠姑病侍奉湯藥晨昏不懈姑歿哀毀過甚逾年卒守節三十餘年長子嵩

例監生次子崗貢生

門雙節 戴氏 孟氏

戴氏州民徐文煌妻孟氏徐光裕妻姑媳也戴年

二十五夫歿家貧復遇荒亂携幼子光裕東西

竄避倍歷艱辛守節四十餘年而卒子光裕繼

歿媳孟氏年甫二十九撫五子徐履符等皆成

立其苦節與姑戴約畧相等今六十有四歲現

存

王氏睢寧知縣楊若桐妾年二十三若桐卒痛不

欲生時若桐元配先卒氏念撫孤無人乃忍死

愛育嫡出子士彥兆龍不啻所生家貧甚矢志

不移苦節五十年年七十三卒

顧氏

明文思院副使張大經妻年二十八夫歿食貧守節教子萬策入庠卒年六十

董氏

楊文煥妻年二十四夫歿子于陞六歲孤苦伶仃紡績自給教子入庠守節三十六年年

六十卒孫繼祖考授州同曾孫溥州庠生

袁氏

州民田大發妻年二十二夫歿遺腹未生家貧甚苦守撫孤教遺腹子泓成立守節三十

八年年六十卒

郭氏

州民田繼武妻千總田一元母也年二十三夫歿有遺腹子一夔越六月始生家貧甚甘

心茹苦撫三子成立守節五十餘年年七十餘卒

金氏 州民傅應科妻夫病八年侍奉弗怠夫歿氏年二十九子方八歲食貧撫孤教之成立守節已三十六年今六十五歲現存

州守吳公存禮旌之日義高彤史

王氏 齊應輔妻夫亾守節署州事陳公廷柏給扁曰柏舟自矢

陳氏 周崇禮妻夫亾守節署州事陳公廷柏給扁曰一門節孝

崔氏 李懋林妻夫亾守節署州事陳公廷柏給扁曰志凜冰霜

李氏 穆奎龍妻夫亾守節撫遺腹子繼宗成立以延穆氏祀州守吳公存禮給扁曰純孝完貞

羅氏 王永爵妻有孝行州守吳公存禮給扁曰女中曾閨

石氏 張 妻割股療翁疾州守王公光謨給扁曰婦孝格天

陳氏 羅朝標妻割股療夫疾州守王公光謨給扁曰天心孝感

崔氏 王信善妻割股療夫疾州守王公光謨給扁曰懿範可風

茅氏 錢起龍妻割股療親疾州守吳公存禮給扁曰惇孝性成

王氏 王有道妻割股療夫疾州守王公光謨給扁曰志切所天

灤縣列女附

明李氏生員董恕妻年二十二恕卒氏哀毀幾絕念

子生甫一歲願撫養成人爲恕後堅志守節以

死自誓弘治間奏旌其門

謝氏順義縣人都司聶敏之妾年方壯敏卒撫養

二子應元啟元值歲荒族黨覬其家貲嗾令改
適謝厲聲曰吾有二子可使成立卽天不遂吾
意吾身死附於都司君之墓吾何憾遂呵斥其
族人族人慚懼而退門庭肅然年八十四卒萬
曆間知縣趙廷儼旌其門曰貞節

王氏永樂里人生員馬龍圖妻年二十五夫卒子
泰方七歲自矢守志事庶姑以孝育遺孤以慈
備嘗辛苦曾無渝志及泰長令勵學脩行遂入
縣庠知縣魏之幹給扁旌之萬曆三十五年卒

年七十三知縣艾友芝爲文弔之

文載藝又由
文志

請巡撫以貞節旌其門

劉氏日照訓導張永達繼室年二十二夫亾家業
日替無以自存堅志守節撫其三幼孤皆成立
年八十九卒其孫生員德厚具呈鄒縣知縣魏
之幹給扁旌之時萬曆二十一年也

金氏常希文妻崇禎己巳鄒城陷被執挾之上馬
氏見道旁有井躍入井中身被三創而死時年

周氏翟光國妻崇禎己巳遇兵逼使上馬堅不從
被殺死時年二十一

皇清

沈氏任志伊之妻明萬曆三十九年夫亾氏年十

八子銘鼎甫週歲堅志守節教子入庠爲廩生
有司旌之順治己亥卒年六十有六銘鼎後官
景寧縣令

吳存禮曰豪傑爲間氣所鍾此言良信通滬四望
平曠無崇岡峻嶺然衆水會流迅激者多滌洞
者少生其地者類皆剛勁英果之材歷徵曩哲

慷慨俠烈矯然不群心竊嚮往之且非獨丈夫
也女子節義自矢奮不顧身沈鷲勇往之氣干
古猶存豈非土厚水冽風氣使然乎古云豪傑
多出幽并有以也而或者以爲燕丹遺烈迂矣
若夫后妃之賢戚里之貴僊釋藝術之奇異亦
其地之靈秀所發也用詳列焉

通州志
卷之十一
名
三

僊釋

洞清張真人不知何許人元至正間於通州舊城南門內結廬脩煉白晝冲舉後人卽其地建祠名悟仙觀

雷通定邊衛世職家子也少落拓州里間明宣德時家樵樓側設機織絹爲業暑月輒臥樵樓納涼夜半聞檐際偶語曰明日石橋北酒壚新張我輩往飲取蓮花作下酒物通聞其語隱隱在空際明日跡至石橋果有酒壚候之見四人持

通志
卷之二
三
豬肝至索酒痛飲割豬肝生啖之通意其爲仙
直前拜懇求度四人者不顧飲啖自若通叩請
不已四人走出先後躍入井中通亦隨入井遂
不知所之間歸持一鯉爲母壽而里人見其携
鯉行金陵道中者卽此日也後其妻鄭氏歿持
紙錢至墓焚化及嘉靖間有一道士持瓶至其
家自道姓名曰我雷通也時已百年其裔孫震
訝之曰聞吾祖有名通者仙去今果來卽出延
之莫知所在今雷氏家譜稱嘉靖間勅封爲黑

虎真人云

誠意道人姓牛名斗熒州庠生明萬曆間屢舉不
第後遇一道人蒼髯童顏削一足授以詩曰萬
劫千塵得此身幾回出沒幾回新而今不向無
生度更向何方去問津熒以弟子禮事之求度
世術道士授以九轉金鼎之書斗熒晝夜參索
久之有悟作詩云功名蓋世春來夢富貴驚人
水上漚遂道裝出遊莫知所之後二十餘年有
里人入洋遭風泊一島見一道人手執塵尾自

通州志 卷之十
稱誠意道人卽潞羆諸生牛斗熒也寄書訊其
舊時同學云

韓十洲名登瀛少爲諸生善讀書工草隸性曠達
不喜穀食究心釋典叅求上乘常欲訪道名山
以父在不果明崇禎壬午爲道裝告其家人曰
南遊卽返自是莫知所向後里人於揚州見之
識其爲韓十洲也語以家事直視不答子禹甸
順治間令烏程罷官寓吳中適他往其子禎年
十二戲門外見一道士操北音曰爾父安在禎

惡其倨曰爾焉用知吾父道士曰欲爾父一見
我耳遂去翌日禹甸歸以告窮其狀貌聲音殆
十洲也大驚遍訪之卒不得

僧一空俗姓江名免曲陽人叅定州上生寺湛廣
和尚得臨濟正傳明弘治間杖錫來通住城南
梨園寺焚修一日謂其徒古心曰吾將逝矣乃
沐浴更衣作偈曰倒騎鐵馬歸原籍明月清風
任自由端坐而化

陳祖通州邢家庄人俗名道安顓樸務農時淨空

祖師卓錫薊之盤山行脚經其莊道安心竊慕
之棄家隨之入山叅悟幾十年生精進心常於
暑夜裸體跌坐山崖供蚊蚋噬嚙已而坐化弟
子爲立塔山下今盤山李靖庵奉爲二代祖以
淨空爲開山祖也

癡和尚不知何許人狀肥而黑樸陋寡言悠悠忽
忽似不解世事者人以痴名之明天啟間寓塔
院日乞食以生欲乞卽得以所食之餘隨意予
人人見其所得之易謬以所難得者難之亦冥

然而往隨處逢緣於是游僧乞丐一切饑寒疾
病之人無不以爲外府亦無不冥然而往市中
高呼聲甚厲頃刻立辦衣破衲冬夏赤脚行或
問之曰恐虫當屐而死一飯常兼數人食與之
言或答或不答間有所答輒出深至語刺人心
髓令猛省再叩則又支吾誕謾矣里中羣兒或
爬搔其頭面手足或飛瓦礫擊之或詐巧給之
欲令其瞻顧俛仰顛倒而卽之漠然如不覺平
居閉目靜坐念佛不住口出不避風雨崇禎十

六年忽辭衆適京師某寺坐化

僧克念不知何許人行脚至靖嘉寺習祛魔之術
晝夜不寐稍倦卽攀窓櫺或圍屏作鳥伸伏康
熙二年坐化又先有一老逸其名居東門甕城
白衣庵自言一百八歲順治十四年坐化

僧靜學俗姓曹名登科通州衛千戶曹應利子也
家富有室康熙八年九月棄家入京師愍忠寺
落髮爲僧遊江南名勝不知踪跡俗呼爲曹和
尚云

僧性海焚修聖教寺康熙七年坐化

掃雲名明章俗姓張徽州人幼隨祖上奎令蜀中
過青城峨眉諸山已有出世之志年十五博綜
經史旣而棄去曰吾安用此糟粕爲潛心內典
恍然有得遂祝髮徧遊名山入劔南登九華陟
匡廬歷齊魯而之燕之潞水上悅玉泉瑩潔就

泉畔精舍以居

舊名關帝廟掃雲改爲玉泉菴

先是菴僧獻廷

守戒律甚嚴素不直釋嘗曰瑜珈妙法必不如
是及掃雲遇之與語大悅曰吾謂千古慧燈必

不泯也遂師事焉掃雲圓通謙謹工詩畫嘗有
名句見許可于新城王侍郎士稹州人士爭敬
禮之謂之緇隱今七十有五歲尚存獻廷名來
珍

藝術

衛公孫字述先精岐黃之術手著經血起止一書
傳世子周宗州庠生能世其業

曹代字唯月號嘯雲其先代郡人祖宦通州因家
焉博學能詩工書畫不肯輕以與人或慕名求

之經年不應抱道自高交情落落子枚亦工畫
羅滄來不知何許人詩畫絕倫嘗見其題畫詩云
悠然曳杖橋東去知是神仙不識名蓋賢而隱
於潞水之上者

聞吉菴杭州人張秦定先生門下士精於醫理僑
寓潞傍

